


ANG IKATULONG SELYO

 Maayong gabii, mga higala. Manindog kita karon sa makadiyut lang para sa pag-ampo. Iduko nato ang atong mga ulo.

² Langitnon namong Amahan, samtang nagakadunggan namo kanang—kanang maanindot nga himno, among—ginahunahuna namo, Ginoo, nga . . . nga haduol ra Ikaw. Ug ginaampo namo nga Imo kaming dawaton karong gabhiona, Ginoo, ingon nga Imong mga anak, nga ginapasaylo ang tanan namong mga sala ug mga kalapasan, ug ginahatag kanamo ang Imong mga panalangin, tungod kay mga tawo kami nga nagkinahanglan.

³ Ug sa niining makuyaw nga panahon nga among gikinabuhian karon, ug nakita namo, matag tuig, nga mas nagakangitngit ug nagakangitngit pa kini, sa kalibutan. Ug ang Pag-abot sa Ginoo mas nagakahayag ug nagakahayag pa, samtang ginapahayag Niya ang Iyang Kaugalingon diha sa . . . sa Iyang Pulong ug sa Iyang kapadayagan. Mianhi na usab kami, karong gabhiona, Ginoo, sa pagpaninguha, niini nga panagtigum, ug sa pag-ampo Kanimo nga ablihan para kanamo, Ginoo, kining Ikatulong Selyo niining Basahon, aron mahipadayag kini kanamo, aron mahibaloan namo kung unsay among pagabuhaton ug kung unsaon namo sa pagkinabuhi, ug kung unsaon namo sa pagkahimong mas maayo nga mga Cristohanon.

⁴ Ginaampo ko, Dios, nga Imong ipaamgo sa matag dili-Cristohanon dinhi, karong gabhiona, ang ilang pagkinahanglan Kanimo. Itugot kini. Ug akong—ginaampo ko, Langitnong Amahan, nga maamgo unta sa matag natawo-na-pag-usab nga Cristohanon nga kinahanglan niyang magkinabuhi nga mas haduol pa kay sa iyang pagkinabuhi kaniadto, aron makadangat kaming tanan nianang pagkahiniusa sa Cristohanong gugma ug pagtoo.

⁵ Itugot nga mamaayo na ang matag tawong masakiton sa among taliwala niining gabhiona, Ginoo. Naamgo nila ang ilang pagkinahanglan Kanimo. Ug ginaampo ko, Amahan, nga panalanginan Mo ang tanan-tanan nga nabuhat o nasulti, alang sa Imong kadunggan ug himaya, sa Ngalan ni Jesus among ginapangamuyo kini. Amen.

⁶ Bueno, karong gabhiona, pag-usab, nagkatigum na usab kita alang niini, sa—sa Miyerkules sa gabii sa semana. Ug nagasalig kita sa Ginoo, niining gabhiona, para sa usa—usa ka dakung pagbubo sa Iyang mga panalangin sa Iyang Pulong. Ug karong adlawa padayon akong nagtuon, sama sa naandan na, ug gapaningkamot nga maghunahuna og mga butang nga

mas angay'ng isulti, ug ang maong butang, kung unsaon sa pagsulti niini, ug dayon nagasalig sa Ginoo nga ihatag kanako ang interpretasyon ug mga kahulogan sa—sa niining Pulong nga gikasulat. Ug mapasalamaton ako Kaniya tungod sa Iyang gibuhat para kanato sa tibuok semana, nga kita . . . sa pag-abli niining Mga Selyo.

⁷ Ug, karon, tingali usa ka maayong butang kung sa Dominggo sa buntag, sa . . . Kabalo na mo, makadaghan nang higayon . . . Dili nato gusto nga dili-masabtan, apan, kabalo na mo, kamo . . . Nagakahitabo gyud ang ingon-ana. Ug busa, siguro, Dominggo sa buntag, ang tanan nga adunay pangutana sa ilang hunahuna mahitungod niini, mahimo n'yong isulat kana ug ibutang kana sa ibabaw sa lamesa dinhi, Sabado sa gabii, ug aron akong makita kung unsa man kana. Ug dayon paningkamotan kong tubagon kana para kaninyo, Dominggo sa buntag, kon itugot sa Ginoo. Sa hunahuna ko mas maayo kana kay sa atong ginaplano, tungod kay usahay man gud wala gyud kini mahisabti, kabalo na mo. Ug busa sa ingon-anang paagiha makuha ko . . . Mas maayo nga akong—maiklaro ko kini, kabalo na mo. Nga kini ingon niana lang gyud kung unsa kini. Tungod, usahay, karon . . .

⁸ Adunay mitawag karong adlaw ug miingon, nga—nga, mitawag ug gustong mahibalo kung tinuod ba, nga, “Sa diha nga—mahitabo na ang Pagsakgaw, aduna lang kono'y usa sa Jeffersonville ug usa pud sa New York, ug ang tanang uban pa niini sa gawas-na-sa-nasud.” Busa, kita n'yo, wala gyud kini mahisabti. Dayon aduna pu'y miingon, nga “Sa Sabado sa gabii, pag-mahatag na sa Ginoo kanato ang kaulahiing Selyo, nan maania kono si Jesus sa Dominggo sa buntag.” Kita n'yo? Busa kini'y usa ka—kini'y usa ka . . . Nakita n'yo, kamo—wala n'yo . . . Kana, dili kana ingon-niana. Ug wala n'yo . . . Dili kana ingon-niana.

⁹ Wala kita masayod. Kung aduna ma'y mosulti kaninyo nga nasayod kono sila kung kanus-a Siya moabot, nan kabalo na mo nga sayup sila, sa sugod pa lang, tungod kay wala gayu'y ni usa ang nahibalo niana. Apan ginatinguha natong magkinabuhi, karong panahona, nga daw sa karon na mismo kana.

¹⁰ Medyo pakuraton ko 'usa kamo sa makadiyut, busa pangandam mo. Ako—nagatoo ko nga moabot si Jesus sulod sa, ubos pa sa, tulo ka minuto gikan mismo karon, sa Iyang oras. Kabalo ba mo kung unsa kaha ka dugay kana? Halos traynta'y-singko ka tuig. Kita n'yo, ang usa ka libo ka tuig usa lang ka adlaw, Kaniya, nakita n'yo.

¹¹ Busa, pagmadungog ninyo ang apostoles dinha nga nagaingon, “Ang panahon haduol na,” dinha, “ang panahon haduol na.” Gisulti kana sa apostoles diha sa Pinadayag. Kabalo ba mo kung unsa ka dugay kana? Kana'y wala pa . . . Kana'y kagahapon lang, para sa Dios, wala pa gani og duha ka adlaw.

¹² Ug, kita n'yo, kung tulo ka minuto kana, mas ubos pa sa tulo ka minuto sa Iyang Pag-abot, kita n'yo, kana'y traynta ka tuig, halos, para kanato, o morag ingon niana. Ug tan-awa kung unsa, kung unsa ang tulo ka minuto para Kaniya: nagatindog na Siya, aron sa pag-anhi. Busa kita, kamo. . . usahay pag mobasa kamo dinhi, nagapakigsulti Siya sa mga termino sa Pulong, kita n'yo, dili sa atong mga termino.

¹³ Ug busa kung nasayod ko nga moabot na Siya ugma sa gabii, ugma sa gabii, magtuon gihapon ko ugma ug hangyoon Siya nga ihatag kanako ang Mensahe para sa Ikaupat nga Selyo. Ug moanhi ako dinhi ug iwali Kana, sa gihapon. Kita n'yo? Ako—gusto kong buhaton sa matag adlaw ang butang nga kung moabot na Siya mao'y akong ginabuhat. Ug wala na ko'y hingsayran pang mas maayo nga dapit kay sa makaplagaan nga anaa mismo diha sa pangatungdanan, kita n'yo, ang maana mismo sa pangatungdanan. Busa magpadayon lang kita hangtud nga moabot Siya.

¹⁴ Usahay kung basahon lang nato, ug, karon, magbantay gyud. Ug kung basahon n'yo lang, ipatukar gyud ang teyp, og paminawon og ayo. Tungod, makuha ninyo kini sa teyp, dugay na nilang ginapatukar kini nga mga teyp, ug maayo kaayo ug klaro kaayo. Busa, inyo kining mas masabtan dinha.

¹⁵ Karon, nagalaum kong, nahigugma ang tanan kang Cristo, karong gabhiona, ug nagahigugma gyud unta ang tanan Kaniya.

¹⁶ Sultihan ko kamo kung unsa, usahay, ang nagapalibog sa mga tawo, mao kanang misulod ug wala makadungog sa unang bahin sa panerbisyo, nakita n'yo. Dayon pagsulod nila ug madungog ka nila nga nagapahinungod, nagahisgot, og usa ka butang, ug dayon sabton na nila nga ingon niana, kung unsay gisulti, ug wala man lang nila nadunggan ang unang bahin. Busa makapalibog gayud kana kanila, nakita n'yo, kung ingon-ana. Ug hunahunaon nila nga adunay lahi nga gikasulti, apan Kini—apan dili baya ingon-ana.

¹⁷ Busa kung aduna kamo'y pangutana nga wala ninyo masabti, isulat n'yo lang kana sa usa ka papel. Ihatag kana, bisan unsa mang orasa gikan karon hangtud sa Sabado sa gabii. Ug paningkamotan ko, Dominggo sa buntag, nga. . . Kung medyo nakapalibog kana, moingon mo, “Bueno, unsa kaha'y buat ipasabot *niini* dinhi. Wala ako nakasabot *niini*.” Kabalo na mo kung unsay buat kong ipasabot. Dayon paningkamotan kong tubagon kana para kaninyo, sa Dominggo sa buntag, kon itugot sa Ginoo.

¹⁸ Karon, niining gabhiona magabasa kita pag-usab gikan niining mapanalanginong karaan na nga Pulong, sa ika-6 nga kapitulo. Ug sugdan nato karong gabhiona ang Ikatulong Selyo. Ug kana mao'y sa ika-5 nga bersekulo, sa ika-5 ug ika-6 nga bersekulo.

19 Ug ugma sa gabii matapos na nato ang upat ka mga mangangabayo; ang puti nga kabayo, ug ang pula nga kabayo, ang itum nga kabayo, ug ang luspada nga kabayo.

20 Ug gusto kong isulti kini. Nga, sa matag higayon, bisan hangtud kaganinang buntag, mga. . . Oh, mibangon ako, nga sayo pa kaayo ug nag-ampo na nga wala pa og unsa man nga makaistorbo, ug padayon lang nga nagaampo sa tibuok adlaw. Apan kaganinang buntag, sa sayo, miabot ang Balaang Espiritu sa kung asa ako. Ug sa ingon ka klaro sama sa unsa mang butang, ako—nakita ko nga naablihan kining usa pa ka Selyo, ingon ka eksakto gayud. Karon—karon—karon, madungog Niya ako, nasayod ko. Ug mapasalamaton gyud ako.

21 Karon, hinumdumi nga aduna gyu'y nagakahitabo. Nga, ako—nagalaum ko nga nasabtan n'yo unta kini, kita n'yo, adunay. . . nga aduna gyu'y nagakahitabo. Gusto ko lang sulayan kining iglesia sa usa ka higayon, ug tan-awon kung masabtan ba gayud nila ang usa ka butang sa dili pa kini mahitabo. Karon hinumdumi, hinumdumi n'yo kung unsay gisulti ko kaninyo. Ug, karon, tabangan unta kita sa Ginoo.

22 Karon sa ika-5 nga bersekulo.

Ug sa pag-abli niya sa ikatulong selyo, nadungog ko ang ikatulong buhing binuhat nga nagaingon, Umari ka. . . tan-awa. Ug nakita ko, ug ania karon ang usa ka maitum nga kabayo; ug ang nagkabayo niini may timbangan diha sa iyang kamot.

Ug nadungog ko ang usa ka tingog nga diha sa taliwala sa upat ka mga buhing binuhat nga nagaingon, Kinahanglan usa ka denario ang bili sa usa ka litrong trigo, ug kinahanglan usa ka denario ang bili sa tulo ka litrong cebada; apan ayaw pag-unsaa ang lana ug. . . bino.

23 Karon hatagan 'sa nato kini og paghulagway diyutay, mahitungod sa Mga Selyo nga natapos na nato. Tungod kay, sama ra usab sa mga kapanahonan sa iglesia, bueno, gipaningkamotan man nato nga maghatag og hulagway, aron medyo maitakdo kini, hangtud nga mahimo ninyong. . . Ingon niana ang nagakahitabo sa mga kapanahonan diha sa Kasulatan, nagasumpayanay nga may pagsapaw sa usa'g usa, nga sama niana. Sama lang sa pagkatkat sa hagdanan, ug sa pagkatkat sa usa ka ang-ang, diay; ang usa nagakasumpay paingon sa usa pa, ug ingon niana pagmonaug ka, ingon niana usab pagmosaka ka.

24 Ug karon, kining Mga Selyo, ang. . . Kini'y usa ka—ang Basahon sa Katubsan, nga selyado. Nakasabot ba ang tanan niana? [Nagaingon ang kongregasyon, "Amen."—Ed.] Ug selyado kining Basahon og Pito ka Mga Selyo. Kini'y usa ka Basahon nga selyado og pito-ka-selyo. Kita n'yo?

²⁵ Ug karon timan-i, sa diha nga atong ginahulagway kini kaninyo, ug gikuha kini gikan sa Jeremias ug uban pa. Karon, sila, pag aduna sila’y. . . Nagasulat sila kaniadto nga sama *niini*, diha sa usa ka buok nga—nga eskrip, o usa ka papel, diay; o, dili nga papel, kondili usa kadto ka panit-sa-hayop. [Ginahulagway ni Igsoong Branham ang paglukot ug pagselyo sa usa ka basahong-linukot, pinaagi sa paggamit og mga panid sa papel—Ed.] Ug lukuton nila kini, nga sama *niini*. Karon kana . . . Ug pagkahuman ang tumoy niini himoon nilang nakaingon *niana*, mao kana’y timailhan kung unsay nakasulat dinha. Dayon ang usa na usab mao gihapon ang pagkaporma niini, nga linukot sa mao gihapon nga paagi, nakalukot nga sama *niana*. Ug pagkahuman, dinhi sa tumoy, gision kini nga sama *niana*, ug ipabilin ra nga ingon niana usab para sa usa na usab.

²⁶ Bueno, ingon-ana pud ang Basahon nga selyado og pito-ka-selyo. Karon wala na kita’y mga Basahon nga sama *niana* sa karon. Ang mga Basahon sa kaniadtong panahon mao’y mga basahong-linukot. Ginalukot ang mga niini. Ug dayon pag may nagustohan silang hilisgotanan o unsa man. . . Sama ra kung—kung nakalukot ang Biblia, og gusto mong basahon ang Basahon ni Isaias; moabli ka dinhi sa Isaias, buklaron mo lang Kini nga sama *niana*, ug basahon Kini. Ug usa kini ka Basahon sa Katubsanan nga selyado og pito-ka-selyo.

²⁷ Ug karon nahibaloan nato nga mitungha ang Cordero, gikuha ang Basahon gikan sa kamot Niadtong nagalingkod sa Trono, ug gibadbad ang Mga Selyo, ug—ug gitangtang. . . ug gitangtang Kana, gitangtang ang Mga Selyo ngadto sa mga tawo.

²⁸ Ug ang upat ka mga Buhing-binuhat nga nagalingkod didto, nga atong gihisgotan diha sa mga kapanahonan sa iglesia, ang mao gihapong upat ka mga Buhing-binuhat, makita n’yo na sila sa tibuok Kasulatan, ug sila Mao Ang nagapahibalo bahin niining Mga Selyo nga giablihan. Karon, ug makita nato nga kini’y usa—usa ka Basahon sa Katubsanan.

²⁹ Dayon mibalik kita ug gibalikan ang—ang mahitungod sa Kabanay’ng Manunubos, ug gihisgotan Siya, aron mahibaloan kung unsay Iyang buluhaton. Ug karon sulod sa niining daghang mga katuigan, dugay nang ginabuhat ni Cristo ang buluhaton ingon nga Kabanay’ng Manunubos. Karon, ang tanan nga nakasabot niana, moingon, “Amen.” [Nagaingon ang kongregasyon, “Amen.”—Ed.] Dugay na Niyang ginabuhat ang buluhaton sa Kabanay’ng Manunubos.

³⁰ Apan moabot ang panahon sa dihang matapos na ang buluhaton sa pagtubos. Ug pag matapos na ang buluhaton sa pagtubos, nan biyaan na Niya ang Trono sa Dios, kon diin Siya nagalingkod karon. Apan dili man kana Iyang Trono. “Siya nga nagmadaugon magalingkod uban Kanako sa Akong Trono,

maingon nga nagmadaugon Ako ug milingkod sa Trono sa Akong Amahan.” Dili kana Iyang Trono. Panag-iyá kana sa Espiritu, sa Dios. Si Cristo, ang Cordero, dili kana panag-iyá Niya. Siya mao ang nagpakatawo nga Dios, kita n’yo; ang mao gihapon nga Dios, nga nagpakatawo. Karon, nagatindog Siya gikan sa lingkoranan. . .

³¹ Una, miabot ang pagmantala, kadtong, “Kinsa ba’y arang makaduol ug tubo-. . .ug kuhaon kining Basahon sa Katubsanan?” Kita n’yo, tungod nga ang tibuok plano sa katubsanan, gikan kang Adan, ang tanan niini giwala ni Adan.

³² Wala gyu’y unsa man ang nawala hangtud kang Adan. Ug pagkahuman ni Adan, nawala na ang tanan-tanan, sa yuta. Ug ang tanang butang sa kabuhatan sa yuta nawala gayud. Ug nahulog ang tanang butang uban ni Adan, mitabok sa dalama, nga walay ni usa ang makabalik, wala gayud. Ang tawo, sa nakasala siya, mibiya siya sa iyang dalan, wala na gayu’y paagi nga makabalik pa siya. Ug dayon ang. . .

³³ Sa diha nga gipangutana kini nga pangutana; si Juan nga tigpadayag, kadtong. . .propeta nga si Juan, sa dihang atua siya sa panan-awon ug nakita niya kini. Ug walay bisan kinsa sa Langit, walay bisan kinsa sa yuta, walay bisan kinsa sa ilalum sa yuta, o si kinsa man, nga takus bisan lang sa pagtan-aw sa Basahon. Kita n’yo? Karon hunahunaa lang kana! Dayon miduol ang Cordero, ug gikuha Niya ang maong Basahon. Karon gihangyo si Juan nga dili na mohilak pa. Miingon Siya, “Ania karon, nagmadaugon ang Leon ni Juda, ug—ug mahimo Niyang kuhaon ang Basahon ug ablihan Kini.” Busa, milingi siya aron tan-awon kini nga Leon, ug Cordero hinoon ang nakita niya. Gimantala sa anciano, miingon, “Ang Leon nagmadaugon.” Apan sa dihang miduol si Juan ug mitan-aw, usa ka Cordero ang mitindog gikan sa Trono.

³⁴ Karon, wala gayud ni Juan namatikdan Kana kaniadto. Ngano man? Dugay na man gud nga atua didto ang Cordero, nga nagabuhat sa Iyang pagpataliwalang buluhatan; tungod nagapaagas man Siya og dugo alang sa mga tawo, nagapangaliya alang sa mga tawo, hangtud nga ang kaulahiáng kalag, nga nahisulat sa Basahon sa Kinabuhi sa Cordero sa wala pa ang pagkatukod sa kalibutan, nakasulod na. Magkaaduna lang og ingon ka daghan kanila dinha, ug mao na kana. Kana lang. Ang uban dili gani gustong mosulod; wala man sila’y tinguha nga mosulod. Ug busa, kung ingon-ana, pagmakasulod na kanang kaulahiáng kalag, nan ang panahon sa pagtubos matapos na.

³⁵ Dayon motungha ang Cordero aron angkonon ang Iyang mga katungod kung unsay Iyang mga gitubos na, ug ang tibuok kabuhatan kana. Panag-iyá man Niya ang yuta ug ang tanang butang. Kita n’yo? Gitubos Niya kini pinaagi sa Kaugalingon Niyang Dugo. Ug sa diha nga miduol Siya aron kuhaon

kining Basahon, aron ablihan Kini, aba, grabe, sila’y . . . wala na mihilak si Juan. Ug mitan-aw siya, ug kining maong Cordero usa ka gipatay nga Cordero. Gipatay na kini, ug nabuhi kini pag-usab. Ug karon nahibaloan nato nga ang usa ka gipatay nga cordero usa ka dugoan nga cordero, nga nalukop gayud sa dugo. Gipatay kini. Human nga gipatay Kini, nabuhi Kini pag-usab. Nagalingkod na Kini didto sa Trono, ingnon ta, didto sa luyo sa Trono, nga sama *niini*, nga nagapangaliya alang sa tanang mga kalag nga mangduol. Dayon pagnakaduol na kining kaulahiang kalag, nan matapos na kini, ang . . . gigunitan gihapon sa Dios ang maong Basahon sa Katubsanan. Kita n’yo? Karon ginabuhat lamang Niya ang buluhaton sa pagka-Kabanay karon.

³⁶ Sama, ni Boaz nga miadto didto, ug nagalingkod lamang si Ruth didto nga nagahulat hangtud nga si Boaz . . . ang buut kong ipasabot, nga gibuhat ni Boaz ang pag- . . . pagka-kabanay, ang buluhatong pagtubos. Mahinumduman pa ba ninyo akong nagwali niana, dili pa lang dugay? Si Ruth, ang nagapangtapok; ug, si Ruth, bisan unsa ma’y iyang gibuhat; ug uban pa, ug ang ulahing butang mao’y, si Ruth, nagahulat lang. Mahinumduman n’yo ba kung giunsa ko kana pagtipo sa Iglesia? Samtang, miadto si Boaz aron buhaton ang pagka-kabanay nga buluhaton sa pagtubos. Gibuhat niya kini; gitangtang ang iyang sapatos ug nag-testimonyo, ug gitubos si Noemi, ug, tungod niana, naangkon—naangkon niya si Ruth. Karon, busa, nagahulat lamang si Ruth, tungod kay humana man siyang naghago. Nabuhat na niya ang tanan na niining uban pang mga butang, apan nagahulat ra siya kaniadto. Ug dayon sa dihang . . . Nagahulat ang Iglesia, nagapahulay (daghan kanila, halos tanan sila, diha sa abog sa yuta), samtang ginabuhat Niya ang Iyang buluhaton ingon nga Kabanay’ng Manunubos.

³⁷ Karon mas nagkadautan pa ang kalibutan. Ug nagkatipun-og ang sala, ug—ug ang balatian, ug mga kasamok, ug kamatayon, ug kagul-anan. Nagakamatay ang walay-Dios nga mga kalalaken-an ug walay-Dios nga mga kababayen-an. Ginapang-ut-ut sila sa kanser, ug tanan nang uban pa, ingon nga dili sila makaangkon og igong pagtoo aron makakab-ot ug makagunit og alibyo.

³⁸ Karon matikdi. Apan pagkahuman nga matapos na kini tanan, human sa Iyang pagpa- . . . pagmatapos na ang Iyang pagpangaliya, moadto na Siya, og kuhaon ang Basahon gikan sa kamot Niya. Ug dayon si Juan, ug ang tanan nga atua sa Langit, ug misugod silang . . . Ang mga kalag nga anaa ilalum sa halaran misugod sa pagsinggit. Mahisgotan nato kana sa Ikaunom na nga Selyo, pag-usab. Ug nalipay gayud sila! Ug—ug nanaghapa sila, ang mga anciano, ug gibubo nila ang mga pag-ampo sa mga balaan. Ug ang mga kalag nga anaa ilalum sa halaran nanagsinggit, “Takus Ikaw, tungod kay gitubos Mo kami sa Dios!

Ug mamalik kami sa yuta, aron magkinabuhi ingon nga mga hari ug mga sacerdote.” Oh, adunay usa ka dakung. . .

³⁹ Ug miingon si Juan, “Ang tanan nga anaa sa Langit, ang tanan nga anaa ilalum sa yuta, ug ang tanan na,” nadungog siya nga ginadayeg ang Dios mahitungod niadto. Siguradong nakita mismo ni Juan ang iyang ngalan Didto, kabalo mo. Sa tibuok niadtong higayona!

⁴⁰ Dayon miingon siya, “Takus Siya nga mokuha sa Basahon sa Katubsanan.” Karon dili na kana panag-iyas sa Maghuhukom. Panag-iyas na kana sa Manunubos, ug human na Niyang gibuhat ang buluhaton sa pagtubos.

⁴¹ Karon igapakita na Niya sa Iglesia kung unsay gibuhat Niya. Amen. Kita n’yo? Dayon gikuha lang Niya. . . Apan sirado pa ang Basahon. Walay si bisan kinsa ang nasayod, man lang. Hingsayran nila nga usa Kini ka Basahon sa Katubsanan, ang anaa Niini dinha, apan igapadayag lamang Kini sa kaulahiing mga adlaw. Sumala sa Pinadayag 10, ang ikapitong manulonda mao ang pagahatagan og Mensahe mahatungod Niana. Tungod, giingon man Niini, nga, “Sa panahon na sa pagtingog sa ikapitong kapanahonan sa iglesia, ang ikapitong manulonda, pag motingog na siya, ang tanang mga tinago sa Dios matapos na, sa pagtingog niya.” Dayon, human nga mahipadayag Kini, mokanaug na ang Manulonda gikan sa Langit, nga mao si Cristo. Karon hinumdumi, anaa na kini nga manulonda sa yuta, nga usa ka mensahero.

⁴² Mokanaug na si Cristo, makita n’yo Siya diha sa ika-10 nga kapitulo sa Pinadayag; nga ginatunob ang Iyang usa ka tiil sa yuta, og ang usa pa sa dagat; may balangaw ibabaw sa Iyang ulo, ang mga mata sama sa. . . ug ang mga tiil sama sa kalayo, ug uban pa; ginapataas ang Iyang kamot, ug nagapanumpa Kaniya nga buhi hangtud sa kahangturan, nga anaa sa Trono, nga, “Matapos na ang panahon.” Ug sa dihang gihimo Niya kini nga pagpanumpa, mitingog ang Pito ka Mga Dalugdog.

⁴³ Ug ang tigsulat, nga, sa dihang gisakgaw si Juan, isulat na niya unta kung unsay nakita niya. Misugod na unta siya sa pagsulat. Ingon Niya, “Ayaw Kana isulat.” Tungod kay. . . “Ayaw Kana isulat.” Kini’y usa ka wa. . . Ingon Niya, “Selyohi Kana.” Sa unsa? “Selyohi. Ayaw Kini isulti.” Kita n’yo, igapadayag ra Kini, apan wala gani Kini nahisulat diha sa Pulong.

⁴⁴ Ug dayon sa dihang gisugdan na Niyang ablihan ang Mga Selyo, nahibaloan nato, makapalibog kaayo kadto. Kita n’yo? Sa diha nga giablihan Niya ang Unang Selyo, naghunahuna si Juan, “Karon ania na Kini nga magasulti’g, ‘Ug mahitabo nga pagalingkoran na ni *ingon niini-ug-ingon niana* ang trono, ug *adunay* mobuhat *niini*, ug buhaton *niini* ang *ingon-niana*.’”

45 Apan pagkaabli niadto, ania siya nga mitungha, usa ka puti nga kabayo, nga nagadagan, ug usa ka mangangabayo ang nagasakay niini. Bueno, “Aduna siya’y usa ka pana sa iyang kamot; ug gihatagan siya og korona, wala magdugay,” ang ingon ni Juan. Kana lang.

46 Ug mitalikod pag-usab ang Cordero, ug giablihan ang usa na usab ka Selyo, ug ania mitungha ang usa ka itum...usa ka mangangabayo sa pulang-kabayo. “Ug aduna siya’y usa... gihatagan og usa—usa ka espada; ug magapakiggubat siya; ug gihatagan og dakung kagahum, ug wagtangon ang pagdinaitay gikan sa yuta, ug magpinatyanay ang usa sa usa.” Kana’y medyo usa ka...usa gihapon ka mysteryoso nga butang (dili ba?), sa diha nga Iyang giablihan Kana.

47 Ug dayon padayon siya, ug miingon, “Sa adlaw sa dili pa modalugdog kining Pito ka Mga Dalugdog, ang tanang mga misteryo dinhi mahipadayag na.”

48 Karon tan-awa. Dayon hingsayran pud nato, samtang nagatuon kita, nga, sa tanang nangaging mga kapanahonan, aduna kita’y mga repormador, dili mga propeta. Mga repormador! Ug ang matag katungdanan nila adunay—aduna kini og kaugalingong buluhaton.

49 Sama lang sa usa ka tawo nga—nga tigpaandar og telepono, dili gyud siya eksaktong usa ka electrician. Mahimong buhaton niya ang diyutay’ng trabaho niana. Ug sama ra, kung ang usa ka tawo usa ka lineman, bueno, sigurado siya’y... Ang tawo nga nagakalot para ugsokanan sa poste, ug wala gyud nakabuhat og unsa mang trabaho nga pang-kabli, mas maayo kung dili na lang siya manghilabot og mga kabli; pero puede ra siyang mobuhat og diyutay nga pag-ayo o ingon niana.

50 Apan sa dihang igapahayag na ang tinuod nga Butang sa kaulahiing adlaw, sa kaulahiing bahin sa Iglesia, sa dihang gisulti sa Dios nga magapadala Siya kanato, sumala sa mga Kasulatan. Ug gisusi na nato og ayo kini, nga Iyang gisulti nang daan nga ang Espiritu ni Elias mobalik diha sa usa ka tawo. Karon, sa hunahuna ko ingon na gyud kana ka klaro. Ug kita... Nagapaobot kita niana nga mahitabo; sa kung asa man, sa usa ka dinihogan nga tawo, sa kaulahiing mga adlaw, nga motungha. Karon makadungog kamo og daghang mga panatiko ug tanang uban pa, apan nagapaninguha lang—lang kana nga... Ang yawa kana, nga nagapaninguhang ipahilayo kamo gikan nianang tinuod pagmoabot na siya dinhi, kita n’yo. Apan igapaila man siya sa hustong paagi. Kahibalo na mo kung unsa si Elias kaniadto; ug matikdi kana, ug inyong—mahibaloan ninyo. Ug dayon sa dihang siya... Karon, makaila gayud ang Pinili.

51 Dili ang uban; siguradong dili gyud sila makaila niini. Dili nila makita Kini, usa ka milyon ka milya. Sama sa... Natun-an na nato ang tanan niana, ug gipakita nga bug-os nilang wala

nailhan si Juan, bug-os nilang wala nailhan si Elias, bug-os nilang wala nailhan si Jesus, bug-os nilang wala nailhan ang tanang uban pa sa nangaging mga panahon. Ug mao gihapon ang buhaton nila sa karon, tungod kay gikaingon na sa Biblia nga mao'y pagabuhaton nila. Kita n'yo? Busa kung ingon-ana, sa niana nang panahon, mamahimo Kining ubos ra kaayo. Mamahimo Kining yano ra kaayo. Nga mao'y . . . makapa-pandol sa mga tawo pahilayo Niini. Pagkayano ra kaayo Niini para kanila. Nahibaloan nato, ug kanunay na, nga pag ang mga tawo nahimo nang maantigo ug edukado, ug daghan nang nahibaloan, nan sila gayu'y . . . Ang mga ingon niana gyud nga matang ang dili-makakita niini, kabalo na mo. Kita n'yo?

⁵² Wala sukad nagpili si Jesus og ingon-anang matang sa mga tawo para (mamahimong) Iyang mga tinun-an. Gipili Niya ang mga tawong walay-nakat-onan, mga mananagat, ug mga walay kahilambigitan sa ilang mga iglesia ug mga ingon-ana. Mikuha lamang Siya og ordinaryong mga tawo, mga maniningil og buhis, ug mga mag-uuma, ug mga mangingisda, ug uban pa, aron buhaton ang Iyang buluhaton. Kita n'yo? Tungod nga, sila—nasayod man sila nga sila walay-kapuslanan, mao nga makahimo Siya og usa ka butang pinaagi kanila, kita n'yo. Basta padayon lang nilang hingsayran nga sila walay-kapuslanan, nan makapamuhat gyud ang Dios.

⁵³ Apan pag maghunahuna gani sila nga aduna sila'y nahibaloan, nan, “Wala gyud ka'y hingsayran og unsa man nga angay mo untang mahibaloan,” nagaingon ang Biblia. Ug busa, kung ingon-ana, atong—atong makita kana.

⁵⁴ Ug karon, nahibaloan nato, kung ingon-ana, nga kining mga misteryo kinahanglan gyud nga maipadayag.

⁵⁵ Ug nganong kining uban nga mga kalalaken-an, si Wesley, si Luther, ug kadtong bantugang mga repormador, nga nagdala og pagpakamatarung, pagpakabalaan, ang kapanahonan sa Pentecostal nga may bautismo sa Balaang Espiritu ug mga ingon-niana, nganong wala man nila masabti kini—kini nga mga Mensahe? Nganong wala man nila masabti ang mga Niini? Tungod kay mga repormador ra man sila. Kita n'yo?

⁵⁶ Sama ra, nga kung tan-awon nato sa pikas nga bahin, dihay mga tawo nga “nakadawat og kagahum ingon nga mga hari, apan dili sila mga hari.” Kita n'yo? Kita n'yo? Kinahanglan n'yong bantayan ang terminolohiya sa Biblia bahin sa unsa mang butang. Kita n'yo? Karon matikdi. Apan, kini, ang hinungdan nga duna pa'y simang nga mga butang, duna pa'y misteryoso nga bahin mahitungod sa pagpakamatarung, misteryoso nga bahin mahitungod sa pagpakabalaan, misteryoso nga bahin mahitungod sa bautismo sa Espiritu Santo. Ug, aba, unsa ba nga matang ang . . . ? Mikaon ba diay si Eva og mansanas, o mikaon ba siya og prutas nga granada, o unsa man? Kita n'yo? Ang . . . ?

Unsa ba diay ang binhi sa serpente? Ug—ug ang bautismo ba diay sa ngalan sa “Amahan, Anak, Espiritu Santo,” o sa Ngalan ni “Ginoong Jesus,” husto? Ug, oh, gatasan nianang mga butanga, ang nahibilin nga wala napatin-aw. Kita n’yo?

⁵⁷ Ug dayon sa kaulahi pang panahon, moabot kini nga tawo ug ipadayag niya ang maong butang, kita n’yo, og gamiton ang mga Kasulatan. Igapaila kini sa hustong paagi. Tan-awa. Oo, sir. Ug, karon, dili kini usa ka bantugan, og magarbohon nga butang ha. Daw sa, dinhi sa Biblia, mora’g usa kini ka dakung butang.

⁵⁸ Unsa ba gyud diay ka daku kadto, sa dihang miabot si Juan didto ug nagpangbautismo! Hunahunaa lang ninyo ha. Ang mga propeta, kaniadto, sa kaniadto pa, si Isaias, si Malaquias, ug silang tanan naghisgot na mahitungod kaniya, kung kanus-a siya moabot. Ug sa dihang miabot siya, siya’y nag-inusara lamang, nga tigulang, dili-edukado nga tawo, puno og bungot ang tibuok niyang nawong, ug nakadunghay ang walay-sudlay niyang mga buhok nga mora na’g ulod, ug dakung panit sa karnero ang nakaputos kaniya; wala man lang og edukasyon, og wala gyud naka-eskuwela sa tibuok niyang kinabuhi, sumala sa atong nahibaloan. Kita n’yo? Ania siya nga nagaabot, gikan sa kamingawan, dili gani siya bug-os madawat sa pulpito, ug nagtindog siya didto sa suba sa Jordan ug sugod nanawagan sa mga tawo aron maghinulsol. Kung mahulagway n’yo lang!

⁵⁹ Miingon ang Biblia, nga, “Ang tanang butang mahimong daku kaayo nianang adlaw, hangtud nga ang tanang hatag-as nga mga dapit pagapaubson, ug ang tanang ubos nga mga dapit pagapatas-on.” Oo sir. “Ug ang tanang gansang-gansangon nga mga dapit pagapatagon.”

⁶⁰ Aba, mahulagway ko nga makita sila didto, nagadahum nga pagmotungha na si Juan, o kining halangdon nga mag-uuna ni Cristo, kuhaon niya ang tibuok disyerto ug patagon kini, ug himoon kining matuboan na’g sagbot pag-usab. Kita n’yo? Oh, sila, mahunahuna kong ingon niana gyud ang ilang pagpaabot, sama sa ilang pagpaabot sa karon.

⁶¹ Apan, ubos ra kaayo kadto, nga bisan ang mga apostoles wala-makakita niadto. Miingon sila, “Bueno, nganong gisulti man sa Kasulatan, kung ang...Kung paadto Ka na karon didto aron ihalad? Nganong gisulti man sa Kasulatan nga—nga kinahanglan moabot una si Elias?”

⁶² Ingon Siya, “Miabot na siya, ug wala n’yo nasayran kini. Ug, sa Anak sa tawo, buhaton usab nila ang mao gihapong butang. Apan, si Juan,” ang ingon Niya, “gibuhat lamang kung unsa ang nahisulat na nga buhaton niya. Ug gibuhat usab nila kaniya kung unsa lang ang angay nilang buhaton. Ug,” miingon, “mao man usab ang Anak sa tawo kinahanglan nga mag-antus.”

⁶³ Aba, wala ra, siguro, og usa sa tulo ka bahin sa tibuok kaliwatan sa mga Judeo ang nasayod nga ania diay si Jesus Cristo

sa yuta kaniadto. Wala . . . Tingali'g nakadungog sila bahin sa usa ka panatiko sa kung asa man didto, apan wala lang nila kadto hatagi og unsa man nga pagtagad, padayon lang sila. “Sa mga Iya mianhi Siya, ug ang mga Iya wala modawat Kaniya.” Karon, dinha ako nagatoo nga bisan og . . . Karon, wala niini giingon nga moabot Siya nga sekreto ra.

⁶⁴ Apan ang Pagsakgaw mamahimong sekreto gayud. Busa kung sekreto na kaayo kadto, niadtong miabot Siya, unsa pa ka labaw kaha nga dili-mahibaloan ang Pagsakgaw! Kita n'yo? Dili nila mahibaloan kini. Diretsahan nilang isulti, “Bueno, abi ko ba og magkaaduna kita og Pagsakgaw. Ug tanan niining paghukom ibabaw sa yuta?”

⁶⁵ Moingon Siya, “Kini'y nahitabo na, ug wala kamo mahibalo niini.” Kita n'yo? Mamaingon niana kini, sama lang sa usa ka kawatan sa gabii.

⁶⁶ Sama sa usa—usa ka libro nga akong nabasa, usa ka higayon kaniadto. Unsay tawag niana? *Romeo and Juliet*, mao ba kana, o mora'g ingon-ana? Nagplatar ang lalaki, og hagdanan sa kilid sa balay, sa usa ka paagi. Akong naka- . . . Dugay nga panahon na man gud ang milabay. Ug misaka siya, gikuha ang iyang . . . gikuha ang iyang uyab pagkagabii na.

⁶⁷ Karon, sa ingon niana usab nga paagi kana—kana mahitabo, ug mawala na lang. Dili nga, magpadala sila og usa ka panon sa mga Anghel, nga may dala nga mga pala, ug kaloton ang mga lubnganan. Miingon ang Biblia, “Mangausab kita, sa dili ka pa gani makapamilok sa imong mata.” Usa lang ka pagpamilok, og matapos na kining tanan, ingon-niana ka paspas.

Moingon na lang, “Adunay nangawala.”

⁶⁸ Bueno, mahunahuna ko kung mahimo kaha natong liboton ang tibuok kalibutan, sa karon, adunay lima ka gatus ka tawong nangawala gikan sa yuta matag adlaw, kita n'yo, wala gyud sila'y unsa man nga kasayoran niini. Sila'y mahibaloan na lang, nga nangawala na.

Bueno, dili daghan kaayo ang mahiuban niana nga Pagsakgaw.

⁶⁹ Karon, dili ko gustong hadlokong kamo, ug ako—ug ako—ako—ako—dili ko ginahunahuna nga ingon-niana kini, apan gusto ko lang isulti kaninyo kung unsay Iyang gisulti. Ug kabalo na mo niini, sa inyong kaugalingon. “Maingon sa nahitabo kaniadto sa mga adlaw ni Noe, diin walo ka mga kalag ang nangaluwas latas sa tubig. Walo ka mga kalag gikan sa kalibutan, ang nangaluwas latas sa tubig.”

⁷⁰ Bueno, moingon ka, “Oh, aba! Dili na diay kinahanglan nga maningkamot pa ako.” Nagapakita lang kana nga wala pa kanimog matang sa pagtoo nga gikinahanglan mo.

71 Kung aduna lamang—lamang og usa, ako na kana, amen, tungod kay nagatoo ako. Kita n'yo? Sa ingon nianang paagi n'yo angay'ng toohan kini, kita n'yo, "Ako gyud kana." Sigurado. Gusto kong magkinabuhi nga haduol kaayo Kaniya, nga nahibalo gyud kong kuhaon Niya ako pagmoabot na Siya. Nagatoo ako niini. Husto kana. Busa kung adunay. . . Kung ang tanang uban pa dili-makauban, makauban gyud ako, pinaagi sa Iyang grasya. Tungod kay, gisaad man Niya kana kanako, ug nasayod ko nga ako—maatua gyud ako didto, tungod kay dili man Siya makapamakak. Ug nasayod ko nga ang akong kalag ug kinabuhi nagapamatuod, ug gapaningkamot kong magkinabuhi adlaw-adlaw ingon nga daw sa moabot na Siya, busa ako—ako—ako gyud kanang usa. Ingon niana gyud ang gusto n'yong bation, "Kung adunay walo lang, usa na ako nianang walo; kon adunay lima lang ka gatus, usa gyud ako sa nianang lima ka gatus. Wala ko kahibalo sa ubang tawo, apan gusto ko nga usa gyud ako nianang lima ka gatus." Kita n'yo? Ingon niana ang gusto mong mahinumduman. Kita n'yo?

72 Ug kung dili mo madumduman kini nga sama niana, nan aduna gyu'y problema sa imong pagtoo. Kita n'yo? Dili pa diay ka sigurado nga luwas na ka, kung ingon-ana. Gapamasin ka lang diay niini. Ayaw gyud buhata kana. Bueno.

73 Basin dili na 'ta hinoon makadangat niini nga Selyo, dili ba? Sige. Gusto ko nga, sa matag gabii. . . Wala ko kahibalo kon okey ra ba sa inyo nga gamiton ko ang inyong oras. Puede ra man kita manggawas nga mas sayo-sayo diyutay. Wala man kaayo'y. . .

74 Sa pagpadayag niining, Mga Selyo, hinumdumi, nga usa lamang kini ka bersekulo. Ang una, nagahisgot sa pagmantala niini, ang ikaduha na nga bersekulo. Halos tanan nga mga komentaryo, ug uban pa, sa ilang basa niini, o—o kung basahon mo ang ilang mga hunahuna, ug ako—ug dugay na akong nagatoo nga sama halos sa ginatoohan nilang tanan, nga kanang unang mangangabayo mao ang—mao ang nahaunang iglesia. Apan sa dihang gipadayag kini sa Balaang Espiritu, bug-os gyud kini ka sukwahi niana. Ug busa kung ingon-ana, ang ginabuhat lang niini, ginapakita lang kung unsa kini. Ug dayon paningkamotan kong. . .

75 Karon, para kanako, kini'y sagrado kaayo. Mao kana'y hinungdan nga mas gusto kong tubagon kining mga pangutana. Ug sabton nato kini, ingon nga husto gyud ang pagkasayod sa tanan, ug bisan sa mga nagapaminaw sa teyp, usab, nga masabtan gyud nila. Kita n'yo? Naningkamot kong maghisgot 'usa, kada gabii, og paghulagway, aron dalhon ang mga tawo. . .

76 Ang pagdali-dali nga makasulod ug ang pagtinukloray, ug, dili n'yo kana angay'ng buhaton. Kita n'yo? Apan, nagakahitabo kana, tungod tawo ra man gud ta. Ug mainit pa gyud sa—sa sulod dinhi, ug kamo—ug mao nga dili kamo mahimutang.

⁷⁷ Apan kamo'y, mga buutan gyud. Ang pinakamaayo nga mga tawong nakita kong manglihok, sa tabernakulo, nga dugay na sa niini nga panagtigum; ug nagalingkod ra nga hilum, ug ang mga inahan ginadala mismo ang ilang mga masuso ngadto sa lawak sa mga bata pagmosugod na silang manghilak. Ug maayo gyud kaayo ang tanan.

⁷⁸ Apan paningkamotan kong hatagan kini og paghulagway hangtud nga mabati ko na ang pagdihog sa Espiritu kanako, aron isulti kini nga mga Pulong, og aron isulti kining mga gipadayag kanako. Ug dayon kung aduna man ako, sa kung asa man, sa pagbuhat ko niana, kung masayup man ako dinhi, siguradong dinhi mismo sa atubangan sa tanang mga tawo ihusto Niya kini para kanako. Ako—gusto ko kana. Kini'y—kini'y. . . Gusto ko nga husto gyud Kini. Dili na kinahanglan nga iaplikar kung unsay imong ginahunahuna. Aduna gyu'y husto, ug—ug gusto nato Kana. Gusto nato nga ihatag sa Dios kanato kung unsay husto.

⁷⁹ Busa karon gihisgotan na nato kini, kining mga mangangabayo, sa diha nga nagatungha sila. Ang unang kabayo, karon, ug nahibaloan nato nga kana mao ang—ang anticristo nga migula. Ug dayon nahibaloan pud nato, kagabii, nga ang mao rang mangangabayo nga migula ingon nga anticristo, ingon nga usa ka puting kabayo, nakaplagnan nato siya nga aduna na'y espada, kagabii, nagakabayo, ug nagapamatay na og mga tawo.

⁸⁰ Karon, karon, kanunay nang adunay natural ug espirituwal. Ug alang sa Iglesia, gusto kong itipo kini, sa dili pa kita moadto sa pag-abli niini nga Selyo.

⁸¹ Nga, kung unsa ma'y gihatag Niya kanako, gisulat ko kini dinhi. Aduna ko'y pipila ka mga Kasulatan dinhi, pito o walo ka panid niini, ug samtang mopahinungod ako niini.

⁸² Himatikdi, gusto kong mohatag og pagtipo, bahin sa Iglesia, ug himoon kining klaro kaayo aron sigurado nga inyo gyud kining makita. Kita n'yo?

⁸³ Karon, adunay usa ka natural nga pangasaw-onon kaniadto sa tanaman sa Eden. Mahinumduman ba ninyo kagabii? Kanang natural nga pangasaw-onon, siya mao'y hingugma ni Adan, dili pa niya asawa, tungod kay wala pa man niya siya giila ingon nga usa ka asawa.

⁸⁴ Sama usab ni Maria nga mao'y asawa ni Jose, pero wala pa niya giila siya. "Hingkaplagnan siya nga nanamkon na." Kita n'yo?

⁸⁵ Karon, sa wala pa giila ni Adan ang iyang asawa, siya'y usa lamang ka pangasaw-onon ngadto kaniya. Oo. Ug hingsayran nato nga ang Dios. . . Ang babaye, nahulog siya sa tanaman sa Eden tungod kay napakyas man siyang manggunit sa Pulong sa Dios.

⁸⁶ Karon, nasayod ang Dios nga pagabuhian ra si Satanas sa taliwala nila, busa gihatagan na Niya sila og usa—usa ka dapit nga mapaluyohan; aron mapanalipdan sila. Bueno, didto, kinsa pa ba ang mas nakahibalo og unsa man nga mas maayong dapit aron mapanalipdan, kay sa Dios, kung gusto Niyang atimanon ang Mismo Niyang mga anak?

⁸⁷ Kung gusto kong atimanon ang anak kong si Joseph, bueno, igsoon, ang tanan-tanan. . . Ug kung nasayod kong nakadepende ang iyang kinabuhi niini, aba, akong. . . ug duna man pud ko’y kasarang aron buhaton kini. Bueno, kung ang kuwarenta-kapiye nga sementado, konkretong paril, mao’y—mao’y butang nga makapahigayon niini, kana’y. . . Himoon ko kanang nubenta ka piye, aron lang nga masigurado gyud, kana.

⁸⁸ Ug kung mahunahunaan ko kana alang sa anak kong lalaki, (nga, kung ang mortal niyang kinabuhi mawala man, nagatoo ko nga luwas ang usa ka bata,) unsa pa ka labaw kaha, sa Dios, para sa Iyang anak nga mahimong malaglag sa Walay Katapusan! Unsa kaha’y pahimutangan Niya kaniya? Gipahimutang Niya siya luyo sa Iya Mismong Pulong. Basta anaa ka lang sulod niana nga Pulong, luwas ka. “Kung nagapabilin kamo Kanako, ug ang Akong mga Pulong nagapabilin kaninyo, nan pangayo kamo sa bisan unsa nga buot ninyo.” Mao kana, ang Pulong.

⁸⁹ Busa, nagsuroy-suroy si Eva sa tanaman kaniadto, ug nahinagbo niya ang serpente, usa ka malinglahon kaayo nga binuhat. Ug siya. . . Ug hinay-hinay niyang. . . Karon, tagapikas dapit ang kadtong serpente. Ang Dios nagakinabuhi, nagapuyo, nagapamuhat diha sa pagkamapainubsanon, og wala gayud sukad sa unsa mang ubang pamaagi. Kita n’yo? Karon, ang gamay’ng, mapainubsanong gining nga nagalakaw-lakaw didto, ug miduol didto si Satanas ingon nga usa ka manggialamon, maliputon, og malinglahon nga binuhat. Ug gusto niyang ibaligya sa babaye ang iyang programa. Samtang. . .

⁹⁰ Dili igsapayan kung unsa man ka dugay siya gipalibotan ni Satanas; basta nagpabilin lang siya sa Pulong, okey ra unta siya. [Ginatapik ni Igsoong Branham ang iyang Biblia—Ed.] Kita n’yo? Busa, pasagdi ra si Satanas nga buhaton ang bisan unsa man nga gusto niya; basta magpabilin ka lang sa Pulong. Wala kini’y mahimo bisan gamay’ng kalahian.

Kung moingon man siya, “Aba, masakiton man ka.”

“Pinaagi sa Iyang mga labod naayo ako.”

“Bueno, mamatay ka.”

“Pagabanhawon man Niya ako. Gisaad na Niya kini.”

⁹¹ Kita n’yo, pagpabilin lang gyud sa Pulong. Kana lang. Mitago man gani si Cristo sa Pulong, Siya mismo. “Nahisulat na.” Kita n’yo? Karon, pagpabilin gyud sa Pulong.

⁹² Apan, si Eva, hinay-hinay siyang nagpasagad, apan wala man siya nga bug-os gyud nagpasagad. Usa ra man ka pulong ang iyang napasagdan. Ug mao kadto mismo ang gusto ni Satanas nga buhaton ni Eva. Naaghat niya siya pagawas gikan sa luyo sa Pulong sa Dios, pinaagi sa pagpangatarungan.

Ayaw gayud sulaying mangatarungan sa Pulong sa Dios. Toohi lamang Kini! Kita n'yo?

⁹³ Busa, migawas siya gikan Didto. Ug sa wala pa siya naangkon ni Adan, ingon nga usa ka asawa, nahilabtan na siya ni Satanas. Ug siya . . .

⁹⁴ Ug namatikdan ba ninyo? Gibuhat usab ni Cristo ang mao gihapong butang, nga ingon ka eksakto. Karon, para sa pagtubos, kinahanglan una nga maatua ang Dios. Namatikdan ba ninyo? Si Maria, sa wala pa siya miipon kang Jose, nauna na ang Balaang Espiritu. Amen. Kita n'yo? Dinha miabot ang Manunubos.

⁹⁵ Karon, karon matikdi, nahulog ang natural nga babaye, ug naghatag ang Dios og pamaagi aron maluwas siya. Bisan pa nga nahulog siya, naghatag gyud ang Dios og pamaagi.

⁹⁶ Karon, mao kadto ang unang pangasaw-onon sa ibabaw sa yuta, nga nahulog, sa wala pa siya ug ang iyang bana naminyo. Nahulog siya, tungod sa—hinungdan nga—nga pagpangatarungan, imbis unta nga magpabilin sa Pulong. Nahulog siya. Ug nahulog siya ngadto sa kamatayon, ngadto sa Eternal nga pagkahimulag. Uban niya, gidala niya ang iyang bana ug ang tanang uban pang butang nga atua sa yuta kaniadto. Nahulog siya!

⁹⁷ Karon, apan, ang Dios, nga puno sa kalooy, naghatag og pamaagi aron luwason kadtong babaye. Ug karon gisaraan Niya siya, gisultihan siya nga usa ka higayon, sa umalabot, ang tinuod nga Pulong moabot ra pag-usab kaniya. Ang tinuod nga Pulong igapadayag ra kaniya. Karon timan-i kana. Tungod kay, gisaad Niya si Cristo, pinaagi sa babaye.

⁹⁸ Ug si Cristo mao ang Pulong. San Juan 1, “Sa sinugdan mao na ang Pulong, ug ang Pulong kauban sa Dios, ug ang Dios mao ang Pulong. Ug ang Pulong nahimong unod,” kita n'yo, “ug nagpuyo ipon kanato.” Ang Dios nagpuyo uban kanato diha sa unod. Siya man mao ang Pulong.

⁹⁹ Sa wala pa'y Pulong, usa pa lang kini ka hunahuna. Ug kinahanglan mamahimong binuhat ang hunahuna. Oo. Busa, ang mga hunahuna sa Dios nahimong mga binuhat sa diha nga gisulti kini, pinaagi og Pulong. Kana mao'y sa dihang gipresentar Niya kini nganha—nganha kanimo ingon nga usa ka hunahuna, Iyang hunahuna, ug napadayag kini kanimo. Dayon, magpabilin kini nga hunahuna hangtud nga isulti *mo* kini. Mao kana'y hinungdan . . .

100 Migawas si Moises aron mag-ampo. Nakapalibot kaniya kadtong Haligi nga Kalayo, ug miingon ang Dios, “Adtoi, og ituy-od ang imong sungkod paingon sa sidlakan, ug moingon, pagtawag og ‘mga langaw.’”

101 Wala pa’y mga langaw. Apan miadto na man siya ug gituy-od ang sungkod didto, ug miingon, “Mangtungha ang mga langaw.” Walay mga langaw, sa gihapon. Mibalik na lang. Apan ang mga pulong, nga hunahuna sa Dios, human na man gisulti. Napamulong na, karon kinahanglan gyud kining mahitabo.

102 Karon dili ba ninyo makita kon diin miingon si Jesus? “Kung magasulti ka niining bukid; dili nga kung Ako ang magasulti niini. Kondili *ikaw* ang magasulti niining bukid, ‘Bumalhin ka.’”

103 Ug una, siguro, kadto nga panahon ni Moises, usa ka daku og tigulang nga berdeng langaw ang hinayhinay nga mihagong. Ug, wala magdugay, sila’y lima na ka libra ang gidaghanon matag yarda. Kita n’yo? Asa man kaha sila gikan? Iyang. . . Gilalang sila sa Dios. Dili ba ninyo makita kung giunsa. . .

104 Mahimong laglagon sa Dios kining kalibutan karong gabhiona, pinaagi—pinaagi og mga tagnok, kung gustohon Niya. Bueno, mahimo Niyang mag-kamada og mga tagnok hangtud sa bulan. Ang butang lamang nga buhaton Niya mao ang isulti, “Magkaaduna og mga tagnok, hangtud sa bulan.” Mao lang gyud kana. Walay mga kemikal o unsa man, padayon mismo silang magkadaghan, magkadaghan, og magkadaghan gayud. Kita n’yo?

105 Mahimo Niya kung unsa ma’y gustohon Niya. Siya’y Dios, nga Magbubuhat. Ang buhaton lang Niya mao ang pagsulti lang niini. [Ginapalagitik ni Igsoong Branham ang iyang tudlo sa makausa—Ed.] Husto kana. Siya mao ang Magbubuhat. Karon, kung maamgo lang unta nato kung unsa gayud Siya ka gamhanan! Kita n’yo? Mahimo Niya kung unsa ma’y gusto Niya.

106 Maglingkod ra Siya didto ug motan-aw sa mga tawo, ug tanawon kining mga magtutudlo, nga nagpaka-manggialamon, ug, “Walay Dios,” ug—ug tanan na. Huh! Aba, mora lang sila og atua sa Babel, pag-usab. Babel, diay.

107 Karon namatikdan nato nga gisultihan sa Dios si Eva, nga, “Pagkahuman sa hataas nga panahon, mobalik ra kanimo ang Pulong.” Karon, sa unsang paagi diay nahulog si Eva? Gusto ko nga ang akong mga estudyante ang mosulti niini. Unsa ba’y gikahulogan niya? Unsa ba’y gikahulogan ni Eva? Ang Pulong. Husto ba kana? [Nagaingon ang kongregasyon, “Ang Pulong.”—Ed.] Ang Pulong. Ug miingon ang Dios nga mohimo Siya og pamaagi aron luwason siya pabalik ngadto sa Pulong pag-usab. Oo. Pagkahuman sa hataas nga panahon, mahipadayag ra ang Pulong nganha kaniya. Bueno. Karon moabot ang Pulong alang sa usa ka katuyoan. Kupti pag-ayo

karon, ang akong ginasulti. Moabot ang Pulong diha kaniya para sa usa ka katuyoan, kana mao'y para sa katubsanan. Oo.

¹⁰⁸ Apan, samtang—samtang wala pa kana miabot, aduna siya'y usa ka pangpuli nga mao'y—nga mao'y mamuhat hangtud nga moabot ang panahon nga anaa na ang orihinal nga Pulong. Karon inyong—klaro ba ninyong nasabtan? [Nagaingon ang kongregasyon, “Amen.”—Ed.] Kita n'yo? Gisultihan siya sa Dios nga moabot kaniya ang Pulong pag-usab, apan, hangtud niana nga panahon, gihatagan 'sa Niya siya og usa ka pangpuli hangtud nga moabot na kanang panahona. Busa, gihatagan Niya siya og halad nga pagahimoon, ingon nga usa ka pangpuli alang nianang Dugo.

¹⁰⁹ Karon, ang maong pangpuli nga dugo iya sa mga toro ug mga karnero, ug mga kanding ug uban pa, apan wala man kini nakatangtang sa iyang sala. Kita n'yo? Gitabonan lang niini ang iyang sala. Wala natangtang niini ang sala, wala gayud. Nagtabon ra kini niini. Tungod kay, dugo ra man kadto sa hayop, ug sa dugo sa hayop mao ang kinabuhi sa hayop. Usa ra kadto ka pangpuli hangtud nga ang tinuod. . . Karon sul-oba ang espirituhanon n'yong kupo.

¹¹⁰ Ang tinuod, nga tawhanong Dugo, maingon sa kung unsa ang tawo, nagpakatawo dinha (ang Dios); nga walay pakighilawas, ulay, ang ulay'ng pagkahimugso ang nagpahitabo niana. Karon ang Pulong sa Dios, ang saad, nahimong Dugo, ug nagpakatawo sa Persona ni Jesus Cristo nga Manluluwas. “Ang dugo sa mga toro ug mga kanding, ug uban pa. . .”

¹¹¹ Apan karon hulat sa. Ania ang Dios nga nagsaad, nagaingon nga mahitabo kini nianang panahona pagmoabot na Kini, “Ang iyang Binhi magasamad sa ulo sa serpente.” Karon, kung moabot ang binhi sa babaye nga nagagikan lang gihapon kang Adan, o kaha nagagikan sa serpente, ug uban pa, nan makasasala gihapon kini nga binhi.

¹¹² Mao kana'y hinungdan nga mihilak si Juan. Walay si bisan kinsa, tungod kay wala ma'y tawo. . . Atua na man ang tanan, sa pikas bahin sa gahong, sa pikas dalama. Apan moabot ang panahon sa diha nga pagailisan na kining pangpuli nga dugo sa hayop, pag ang tinuod, og nagpakatawo nga Dugo moabot na: ang Dios, nga nahimong unod ug Dugo. Miingon ang Biblia nga ingon niana gayud Siya. Unang Timoteo 3:16, “Dili malalis nga daku ang tinago sa pagkadiosnon: kay ang Dios nadayag diha sa unod.” Husto kana. Ang ulay'ng pagkahimugso ang mihimo niana.

¹¹³ Karon, ang dugo sa mga karnero ug mga kanding nagtabon lang sa sala, apan wala kini nakapatangtang niini, kay dugo ra man kana sa hayop. Apan okey lang kana, ingon nga usa ka pangpuli.

114 Ug sigurado gyud nga naanad—naanad na sila niana nga pangpuli, ug mao nga nagpadayon lang sila.

115 Ug, sa diha nga, ang tinuod, gikasaad nga Pulong nahipadayag diha kang Jesus Cristo, Nga nagpamatuod nga Siya mao ang Anak sa gamhanang Magbubuhat, ang Dios; ug gipanghimatud-an, Mismo, ingon nga mao ang buhi nga Pulong sa Dios. Whew! Grabe! Gipamatud-an Niya nga Siya mao gayud. Mahimo Niyang molitok og mga butang aron motungha.

116 Wala ni usa ka tawo, o—o unsa man nga butang sa tibuok kalibutan, ang makabuhat niana. Wala ni unsa man sa yuta ang makalalang, kondili ang Dios lamang. Ang yawa dili man makalalang. Usa ra siya ka magtutuis sa kung unsay gilalang na, apan dili siya makalalang. Ang sala mao’y pagkamatarung nga gituis lang. Kahibalo na mo kung unsay buut kong ipasabot. Unsa man ang bakak? Kini mao ang kamatuoran nga gituis lang. Kita n’yo? Unsa man ’sab ang pagpanapaw? Ang husto og legal nga buhat nga gituis lang. Ang tanang sala, ang sala mao ang Kamatuoran nga gituis lang. Karon, dili gayud siya makalalang.

117 Apan sa diha nga miabot si Cristo, gipamatud-an Niyang Siya mao ang Magbubuhat. Siya ang Dugo nga gikasaad na. Karon kung gusto ninyong basahon kana, inyong. . . Ablihan sa nato sa makadiyut. Mogahin man gyud ta og oras niini, bisan pa man, karong gabhiona. Ako. . .

118 Ginapanerbiyos ako niini. Siguro gusto na sa tanan nga mopauli, kabalo mo. Ug busa kini’y usa. . . [Nagaingon ang kongregasyon, “Dili.”—Ed.] Karon ablihan nato ang Mga Buhat 2. Salamat. Ug ato lang. . .

119 Mga Buhat 2, ug mahibaloan nato kung husto ba kini, o dili, kung Siya’y gipamatud-an ba gyud nga Siya’y Dios. Bueno. Atong ablihan ang Mga Buhat 2. Karon ablihan nato dinhi sa ika-22 nga bersekulo, si Pedro nga nagpakigsulti kaniadto, sa Adlaw sa Pentecostes.

Mga tawo sa Israel, patalinghugi ninyo kining mga pulonga; si Jesus nga Nazaretnon, tawo nga gipanghimatud-an kaninyo sa Dios pinaagi sa gamhanang mga buhat. . . mga kahibulongan ug ilhanan, nga gihimo sa Dios pinaagi kaniya sa taliwala ninyo, ingon nga kamo inyo- . . . usa- . . . kamo sa inyong mga kaugalingon nasayran na usab ninyo:

120 “Usa ka tawo nga gipanghimatud-an, nga kini mao ang Dios sa taliwala ninyo.” Pinaagi sa mismong mga butang nga gibuhat Niya, nagpamatuod mismo nga Siya Dios gayud. Ania si Pedro, nga nagatindog sa Sanhedrin, og ginasultihan sila.

121 Nasayod man usab si Nicodemo. Ingon siya, “Rabbi, nasayod kami nga usa Ikaw ka Magtutudlo nga nagagikan sa Dios, tungod nga wala ma’y tawong makabuhat niining mga butanga

gawas lamang kon nagagikan Siya sa Dios.” Kita n’yo? Nasayran man diay nila kadto. Apan ngano man?

¹²² Karon matikdi. Karon, gikasaaran si Eva og ingon niini. Apan sa dihang. . . Miabot kana nga pangasaw-onon sa punto, nga mibalibad, sa diha nga miabot na kaniya ang tinuod nga Pulong. Busa, gibalibaran kini sa maong babaye; ang Hebreohanong pangasaw-onon. Tungod, siya man gyud ang pangasaw-onon sa—sa Dios; mao nga gibulagan Niya siya, nakig-diborsyo. Husto ba kana? Siya unta ang pangasaw-onon sa Dios.

¹²³ Moingon mo, “Bueno, wala pa man sila nakasal kaniadto.” Husto kana. Apan gibulagan ni Jose si Maria sa wala pa. . . Bulagan na unta niya si Maria sa wala pa sila naikasal. Kita n’yo? Siya’y minyoonon na ngadto sa babaye.

¹²⁴ Ug sa dihang miabot Siya, ug ang Pulong nga Iyang gisaad, miabot alang sa kasal, nakaplagan Niya siya nga naputos sa iyang mga pangpuli, og ayo, nga ayaw na niini dawaton ang tinuod nga saad nga dugay nang gisaad, ang Pulong, si Cristo.

¹²⁵ Tingali’g wala ninyo masabti kini. Karon balikan ko kini pag-usab. Gusto kong masabtan gyud ninyo kini, kita n’yo.

¹²⁶ Gikasaraan siya, (ang pangasaw-onon, si Eva), og usa ka Manunubos. Ang iyang Manunubos mao ang Pulong. Ug sa dihang miabot na ang Pulong, nga nahimong unod, gisalikway niya Kini. Gihatagan siya og mga pangpuli. Karon timan-i n’yo lang ‘sa kana, “pangpuli.” Gihatagan siya og mga pangpuli aron lang nga makapadayon, hangtud nga moabot ang Manunubos. Ug sa dihang miabot na ang Manunubos, gusto niyang magpadayon gihapon sa iyang pangpuli, ug gisalikway ang matuod nga Pulong. Nasabtan n’yo ba kini? [Nagaingon ang kongregasyon, “Amen.”—Ed.] Ug mao kadto ang Hebreohanong pangasaw-onon.

¹²⁷ Mao usab ang nahitabo Kaniya, tungod sa ikaduhang Eva, nga pangasaw-onon, ang inahan sa tanang espirituhanon nga buhi. Kita n’yo? Ang *Eva* nagakahulogan “ang inahan sa tanan,” nga espiritu-. . . “sa tanan nga mga buhi.” *Eva*, “inahan sa tanan nga mga buhi.”

¹²⁸ Karon, ug sa dihang miabot Siya para sa Hebreohanong pangasaw-onon, nga siya man unta ang inahan sa tanan nga mga buhi, apan gisalikway niya Kini.

¹²⁹ Nahulog ang natural nga Eva, sa Eden, tungod sa pagpaminaw sa pangatarungan ni Satanas batok sa Pulong sa Dios. Sa ingon-anang paagi siya nahulog. Oo, sir. Nahulog siya tungod kay gibuhat man niya kana.

¹³⁰ Ang espirituwal nga Eva, karon, mao kana ang iglesia, ang pangasaw-onon ni Cristo. Nahulog pud siya, dili sa Eden, kondili sa Roma, kita n’yo, didto sa Konseho sa Nicaea, sa diha nga

gisalikway niya, kadtong iglesiang Pentecostal, nga miadto didto sa Niceaea, ug naminaw hinoon sa pagpangatarungan sa Roma, imbis unta nga manghawid sa Pulong, og mao nga nahulog siya. Ug ang tanan bisan halayo kaniya, namatay uban niya, sa palibot niya. Karon, ingon nga nahulog ang natural nga Eva, nahulog usab ang espirituwal nga Eva. Ang pangasaw-onon sa Dios nahulog—nahulog didto sa tanaman; ang Pangasaw-onon ni Cristo nahulog 'sab sa Roma. Kita n'yo?

¹³¹ Himatikdi, pinaagi sa mao gihapong pagpangatarungan, batok sa Pulong sa Dios, gisurender usab niya ang iyang mga katungod sa kaputli, ngadto kang Satanas. Diin, atong nahibaloan diha sa pagtangtang niining Mga Selyo, nga si Satanas kadto, ug si Satanas sa gihapon ang atua didto. Miingon ang Biblia nga mao kana ang mismong puy-anan ni Satanas. Ug maingon nga gisurender ni Eva ang iyang—iyang mga katungod sa pagkaputli, ug gitugyan kini ngadto kang Satanas, didto sa tanaman sa Eden; ang iglesia usab, ang pangasaw-onon ni Cristo, gibuhat ang mao gihapong butang didto sa Roma, sa diha nga gibaylo nila ang Biblia para sa ilang mga dogma ug mga pagpangatarungan. Makita n'yo ba kung daw sa unsa nga nagakatipo kini? [Nagaingon ang kongregasyon, "Amen."—Ed.]

¹³² Sundon lang ninyo kana nga mga tipo, siguradong paingon gyud mo sa husto. Kung ang akong mga kamot mora og . . . Kung wala ko pa gyud nakita sukad-sukad ang akong kaugalingon, ug makita kong paduol ang akong anino, masayran ko na halos kung unsay akong hitsura. Kita n'yo? Apan, ingon niana kana. Kung gusto ninyong makita kung unsay umalabot, tan-awa n'yo kung unsa ang mga nangagi na. "Kay ang . . . ang tanang nangaging mga butang mga landong lamang sa mga butang nga umalabot," miingon ang Biblia. Oo.

¹³³ Kay, gisurender man niya ang iyang putli nga Pulong, ang Pulong sa Dios, sa diha nga gibaylo niya ang Biblia, ug nagbutang og usa ka tawo didto nga nagaingon nga ang iglesia aduna kono og mga katungod nga usbon ang unsa mang butang nga gusto nilang usbon. Ug gibuhat mismo nila kadto. Ug ang pangasaw-onon ni Cristo, ang pangasaw-onong pentecostal, gibaligya niya ang iyang kaputli, didto sa Niceaea, maingon nga gibaligya pud ni Eva ang iyang kaputli ngadto kang Satanas didto sa tanaman sa Eden. Eksakto gayud. Oo.

¹³⁴ Nagsaad ang Dios; sa niini nga iglesia, sa niining pentecostal nga iglesia, ingon nga nahibalo na nga buhaton bisan pa man sa maong iglesia ang ingon-ana; sama sa gibuhat Niya kaniadto kang Eva, nagsaad gihapon ang Dios.

¹³⁵ Ang pentecostal nga iglesia, nagatoo ba mo nga gibaligya niya ang iyang mga katungod sa pagkapanganay, kaniadto . . . ang iyang kaputli, pagbiya niya didto? Nagatoo ba mo niana? [Nagaingon ang kongregasyon, "Amen."—Ed.] Siya, siguradong,

gibaligya gyud niya. Kung ingon-ana unsa ma'y pulos sa usa ka kredo, kung dili kini nakabasi sa niining Biblia? Gusto ko nga adunay mangita kung unsa kanang gitawag nga Kredo sa mga Apostoles, o bisan usa ka pulong mahitungod niana diha sa Biblia. Usa kana ka kredo sa Katoliko, dili nga kredo sa mga apostoles.

¹³⁶ Basaha ninyo ang Mga Buhat 2:38, mao kana ang Kredo sa mga apostoles, kung aduna siya'y unsa man . . . ? . . . Karon, mao kana ang gigamit nila sa tanang panahon, bisan pa man. Busa kung inyong . . . Kita n'yo?

¹³⁷ Busa, gibaligya nila ang ilang mga katungod sa pagkapanganay. Dili lang kana, ang mga Methodist, mga Baptist, Presbyterian, mga Pentecostal, ug tanang uban pa kanila, mao usab ang gibuhat. Nagtukod siya og usa ka denominasyon. Ang Roma, unsa ma'y nagpahinungdan kaniya nga buhaton kana, nga nagtukod siya og usa ka denominasyon ug nagbutang og tawo ingon nga mao'y pangulo niini. Ug ang mga Methodist, mga Baptist, mga Pentecostal ug ang tanan na, nagbuhat usab sa mao gihapong butang, nagbutang og grupo sa mga kalalaken-an ingon nga mao'y pangulo niini. Bisan unsa pa'y ginaingon sa Dios, sila . . . Kinahanglan n'yong buhaton kini sumala gayud sa gisulti nila sa pagbuhat niini.

¹³⁸ Bueno, unsa man kana? Wala kana'y lain kondili espirituwal nga prostitusyon mismo, sayup nga matang sa babaye; oo, sir, mga kredo, bakak nga mga kredo, og hinimo-ra'g-tawo. Dayon nahimo siyang, sa diha nga gibuhat na niya kana . . . Karon pamatud-an ko kana. Nahimo siyang usa ka bigaon nga babaye, nganha sa Dios. Nagatoo ba mo nga nagasulti ang Biblia niana? Oo, sir. Mao man usab ang gibuhat sa iyang mga anak nga babaye.

¹³⁹ Karon sa Pinadayag 17, kung gusto ninyong isulat kini. Gidala si Juan sa Espiritu, "Ug nakita ko ang usa ka bantugang dautan nga babaye nga nagalingkod sa . . ." Ug atong gibasa kana kagabii. Ug aduna didto og pito ka mga bungtod, ug eksakto gayud sa kung unsay gibuhat niya. Ug gipaambit niya ang kalibutan sa iyang manuhaw'ng mga pagpakighilawas. Husto ba kana? "Ug ang tanang mga hari sa yuta nakapakighilawas kaniya," nanglimbong, ug nangawat, ug namakak, ug nanagbayad lang puli sa paghinulsol, ug—ug mga novena, ug tanang uban pang butang.

¹⁴⁰ Bueno, karon timan-i, nga aduna siya'y mga anak nga babaye. Bueno, kung nahimo siyang usa ka lawas, ug napailalum sa sistemang pang-organisasyon, nan sayup mismo ang tibuok sistema. Ug kung si Eva, sa pagsupak niya sa Dios, napabalhog ang tanan-tanan ngadto sa kamatayon, nga mga napailalum kaniya; ug ang matag iglesia nga nagaorganisa, ginabalhog usab niini ang tanan-tanan ngadto sa kamatayon, nga napailalum

niini. Eksakto. Nalaglag ang maong tibuok butang. Eksaktong sumala kana sa Pulong dinhi. Basaha ang Pinadayag 17. Ug miingon ang Biblia nga Iyang “pagasunogon siya pinaagi og kalayo, ug ang tanan niyang mga anak uban kaniya.” Husto kana. Nagapasabot kana, nga ang matag sistemang pang-organisasyon pagasunogon pud, uban sa maong dautang-babaye.

¹⁴¹ Karon, medyo diretsahan kana, ug ako—nasayod ko nga makadungog gyud mo gikan niana, ug ako—gusto ko usab nga makadungog gikan niana. Ug ako—ako . . . Husto kana, bisan pa. Ingon niana ang gisulti sa Biblia, busa husto gyud kana.

¹⁴² Nahimo siyang usa ka “dautang-babaye.” Mabasa ninyo kana sa Pinadayag, sa ika-17 nga kapitulo. Siya, unsa ma’y gibuhath niya? Nakahimo siya og pakighilawas, batok sa kaugalingon niyang Bana. “Bueno,” moingon mo, “dili, ingon ra kana sa Biblia.” Ang Pulong mao ang Dios. Ug kung magataktak kamo og usa ka butang. . .

¹⁴³ Gusto ba diay ninyong makighalok ang inyong asawa sa ubang lalaki? Kung wala man siya nagbuhath og labaw pa niana, dili gyud ninyo gustohon nga buhath niya bisan kana. Ginapamatud-an niya lang ang iyang pagkadili-matinud-anon.

¹⁴⁴ “Ang si kinsa man nga magataktak og usa ka Pulong gikan Niini, o magadugang og usa ka Pulong ngadto Niini.” Alleluyah! Gusto ni Cristo nga putli gayud ang Iyang Asawa diha sa Pulong. [Ginadukdok ni Igsong Branham ang pulpito sa makaupat ka higayon—Ed.] Kinahanglan ingon niana gayud Siya.

¹⁴⁵ Tungod nga, walay unsa man, wala ni usa ka labing diyutay nga bahin, o tulpok, o unsa man, o kudlit, ang mahanaw gikan niana nga kasugoan, o gikan niana nga Basahon, hangtud nga mamatuman ang tanan Niini. Miingon si Jesus, “Ang mga langit ug yuta mangahanaw, apan ang Akong Pulong dili gayud mahanaw.”

¹⁴⁶ Ayaw gyud paghatag og unsa mang kinaugalingong interpretasyon ngadto Niini. Gusto Niya og putli, walay-sambog, wala ni unsa man nga pagkiat-kiat. Dili ko gustong magbirig-birig ang akong asawa sa ubang lalaki. Ug pagnagapaminaw na gani kamo sa unsa mang matang sa pagpangatarungan, pagawas Niana, nan nagapaminaw kamo, nagakiniat-kiat kamo kang Satanas. Amen! Dili ba kana nagapabati kaninyo og pagka-relihiyoso? [Nagaingon ang kongregasyon, “Amen.”—Ed.] Gusto sa Dios nga magpabilin kamong walay-sambog. Pagpabilin kamo dinha mismo nianang Pulong. Pagpabilin kamo mismo Niini. Oo.

¹⁴⁷ Ang Dios, sama sa Iyang gibuhath kaniadto kang Eva sa tanaman sa Eden, nagsaad ngadto niining kaulahiing Eva dinhi. Nga mao, ang iglesiang pentecostal, ang kinasinugdan sa iglesia, ang iglesia mismo, nga mao ang inahan sa tanan nga buhing mga

tawo, tungod, basta mosulod lang sila dinha. Apan, nakita n'yo, sa diha nga miambit sila sa iyang mga sala, nangamatay sila uban kaniya.

¹⁴⁸ Pag adunay moabot nga tawo. Moingon siya, “Ako—gusto kong mangalagad sa Dios.”

¹⁴⁹ Moingon sila, “Buena, ania ang kinahanglan mong buhaton. Adto 'sa didto ug paghinulsol.”

“Sige, buhaton ko kana. Himaya sa Dios!” Miadto pud didto, og naghinulsol.

¹⁵⁰ “Karon umari ka og pagpamiyembro sa amoa.” Dinha, na ang problema. Uh-huh. Kita n'yo? Mao kana ang nagpahinungdan niadto. Huh! Husto kana, namatay dayon tungod mismo niana. Kita n'yo? Kita n'yo? Kana gayu'y . . . Mao kana ang ginatudlo niining Basahon, kita n'yo, dili ang kung unsay ginasulti ko. Tungod kay, ginasulti man Niini Dinhi, ang ingon-ana. Oo.

¹⁵¹ Karon, gisaaran 'sab siya sa Dios, maingon nga Iyang gisaraan si Eva kaniadto. Giingnan Niya si Eva nga moabot ang panahon nga ang—ang Pulong mobalik ra kaniya pag-usab. Karon mahinumduman ba ninyo kana? Kung unsa ma'y iyang giwala, igauli ra kini. Tungod nga, aduna lamang og usa ka Butang ang makapasig-uli, ug kana mao ang Pulong. Eksakto gayud.

¹⁵² Ingon ko, pagmagpabuto ka og pusil; kung dili mo gani maigo ang target, hibaloa kung asa kaha ka misimang. Kinahanglan mong mobalik dinha ug magsugod pag-usab. Kita n'yo?

¹⁵³ Ug kung mobalik mo, balikan n'yo ang Nicaea. Dinha kamo magsugod na usab, kita n'yo. Balik mo, pahalayo nianang mga organisasyon, pahalayo sa tanan nianang mga iglesia. Ug hingpit gyud nga makita nato sa husto kining Mga Selyo.

¹⁵⁴ Kanunay kong ginahunahuna, sa tibuok kong kinabuhi, kon nganong batok kaayo ko sa mga sistemang pang-organisasyon. Dili sa mga tawo, dili. Ang mga tawo sama lang man kanako o ninyo, o si kinsa man. Apan kangang sistema, kangang sistemang pang-denominasyon, karon nakita ko na kana mismo. Wala gyud ako nasayod niana hangtud karon. Ug husto kana.

¹⁵⁵ Gisaraan sa Dios ang espirituwal nga Eva, sa mao gihapong gisaad Niya sa natural nga Eva, nga Iyang ipasig-uli pag-usab ang Pulong nganha kaniya. Sa kaulahiing mga adlaw ipasig-uli Niya ngadto sa Iglesia, ang orihinal nga Pulong pag-usab.

¹⁵⁶ Karon matikdi n'yo og ayo. Ako—gusto ko karon nga masigurado gyud ninyo. Gisaaran sa Dios si Eva, nga moabot ang panahon nga ipasig-uli ra ang Pulong pinaagi sa iyang Binhi. Kining Pulong, Mismo, mamahimong Binhi. Ug sa dihang gihatagan siya og usa ka pangpuli, nanghawid siya nianang

pangpuli. Ug sa diha nga miabot na ang Pulong nganha kaniya, unsa ma'y iyang gibuhat? "Dili ko gusto kana." Kini'y ubos ra kaayo. Daw sa dili kini husto, para kaniya. Dili kono hinashasan. "Sa usa ra ka pasungan? Oh, grabe! Grabe! Usa ka lalaki nga sama niana, nga wala man lang naka-eskuwela ni usa ka adlaw? Bueno, dili ko madawat kana. Dili kana mao ang Mesias. Usa ka lalaki nga pasagdan rang sipa-sipaon siya sa ubang mga lalaki nga sama niana, ug dayon tawgon kana nga 'Mesias'? Pasagdan ra niyang tabonan og trapo ang tibuok niyang nawong, dayon bunalan pa gyud siya sa ulo? Ug magpatawag sa iyang kaugalingon nga usa ka Propeta, usa ka tinuod nga Propeta, nga mitungha?"

¹⁵⁷ Sa tinuod lang, wala man gud sila nakaila og mga propeta. Mao'y giingon ni Jesus. Ingon Siya, "Kung nakaila kamo sa mga propeta, nakaila unta kamo Kanako." Husto kana.

¹⁵⁸ Karon matikdi. Apan sa dihang miabot na ang Pulong ngadto kaniya, sa paagi, nga eksakto gayud sa paagi nga pagkasulti sa Dios nga moabot Kini; gihunahuna niya nga moabot Kini sa kung unsang uban nga pamaagi. Nagahisgot ako mahitungod sa pangasaw-onon, sa Judeong pangasaw-onon, sa Hebreohanong pangasaw-onon. Ingon niana si Eva kaniadto, sa sugod pa lang. Dayon sa diha nga miabot Kini dinhi, wala niya magustohi Kini. Gusto ra niyang magpabilin sa iyang mga pangpuli.

¹⁵⁹ Karon, gisaaran sa Dios ang espirituwal nga Eva, didto sa Pentecostes, gisulti na kini sa wala pa kini mahitabo, upat ka gatus ka tuig sa wala pa mahulog ang iglesia, nga mahulog gayud sila, ug buhaton nila kung unsay gibuhat nila. Apan, nagsaad Siya, nga sa kaulahiang mga adlaw Iyang ipadala ang Pulong pag-usab.

¹⁶⁰ Gisulti 'sab ni Jesus ang mao gihapong butang kaniadtong ania pa Siya sa yuta; Iyang ipadala Kini pag-usab. Ug unsay... Unsa ma'y mahikaplagan Niini? Mahikaplagan Niini ang mao rang butang nga nakaplagan Niini sa unang pag-abot Niini. Husto. Aduna na sila'y...Sila, nagustohan na nila ang ilang mga pangpuli. Nagustohan na nila ang ilang denominasyon. Nagustohan na nila ang ilang mga kredo. Gusto nilang magkinabuhi sa unsa mang paagi nga gusto nila. Ug gusto nilang, "Bueno, ako'y *Ingon niini-ug-ingon niana*. Miyembro ako sa *Ingon niini-ug-ingon niana*." Wala sila'y labot bisan unsa pa'y ginabuhat sa Dios, bisan unsa pa ang pagpadayag sa Dios sa Iyang Kaugalingon; nga mahimo Niyang banhawon ang patay; nga mahimo Niyang isaysay ang mga tinago sa mga kasingkasing; nga mahimo gyud Niya ang tanang butang nga gisulti sa Biblia nga pagabuhaton Niya. Dili kana igsapayan kanila. "Kung wala kana nahilambigit sa among organisasyon, nan wala Kana'y pulos." Kita n'yo?

¹⁶¹ Mao gihapon ang gibuhat sa Hebreohanong pangasaw-onon kaniadto, husto kana, kita n'yo, naminaw sila sa ilang pangpuli. Ug gisaad na man unta sa Dios kanila ang tinuod. Ug sa dihang miabot ang tinuod, ayaw na nila Kini. Ubos ra kaayo Kini.

¹⁶² Karon mao gihapon kini sa karon, sa dihang—sa diha nga mitungha Kini sa esena. Karon, miingon ang Dios, sa Malaquias 4, nga Iyang ipadala ang Mensahe sa kaulahiing mga adlaw, nga mao'y magpasig-uli. Miingon si Joel, “Akong ipasig-uli ang tanang mga tuig.” Ang tanan nga gikaon sa Roma, ug ang tanan nga gikaon sa mga Methodist, ug ang tanan nga gikaon sa mga Baptist, gikan nianang orihinal nga pentecostal nga sanga, miingon ang Dios, “Akong ipasig-uli sa kaulahiing adlaw.” Husto kana.

¹⁶³ Ug mahimo Niyang magpadala kanato og usa ka tawo nga mamahimong. . . Ang butang lang nga puede padalhan sa Dios sa Iyang Pulong mao'y usa ka propeta, dili mga repormador; kondili mga propeta. Dili pa kadto ang takna para niini. Karon kini mao na ang. . . taliabot na ang maong takna, ug mao kana'y hinungdan nga nagahulat na kita nga moabot kini. Mamahimo kining ubos ra kaayo ug malukmay. Ug pagka. . . Oh, grabe!

¹⁶⁴ Sa hunahuna n'yo ba nga silang aristokratang mga Methodist, mga Baptist, ug Presbyterian, og mga Pentecostal, modawat kaha niini?

“Oh,” moingon mo, “Mga Pentecostal?”

¹⁶⁵ Ang mga Pentecostal nga Laodiceanhon. “Datu, ug walay nakulang kanako.”

¹⁶⁶ Miingon Kini, “Wala ka mahibalo nga ikaw kabus.” Mahimong nagapatukod ka man og minilyon-ka-dolyares nga mga bilding, apan kabus ka sa gihapon, kabus sa espirituwal.

“Oh,” moingon ka, “Nakita ko ang tibuk Niini.”

“Buta ka!”

“Bueno,” moingon ka, “dalaygon ang Dios, nabistihan ako.”

“Hubo!”

“Bueno, nakasigurado ako sa among mga kalalaken-an. Aduna kami og mga seminaryo. Kami. . .”

¹⁶⁷ “Ug wala mahibalo niini.” Bali kaayo. Karon, kung miingon ang Biblia nga ang Iglesia sa Laodicea maana sa ingon niana nga kahimtang. . .

¹⁶⁸ Ug walay tawo sa yuta ang makalimod nga dili kini ang katapusang kapanahonan, tungod kay, ang Kapanahonan na kini sa Iglesia sa Laodicea, o, ang ikapitong kapanahonan sa iglesia. Ug, ania na kita, ang nagakatapos nga ikaduhang duha ka libo ka tuig. Wala na'y mga kapanahonan pa sa iglesia. Mao kana'y hinungdan nga kamong mga kaigsoonang Latter Rain dili na makapatukod og usa ka organisasyon. Dili na gyud

magkaaduna pa. Husto kana. Anaa na kini sa katapusan. Amen. Dili na mahimong magkaaduna pa og mga kapanahonan sa iglesia. Human na kini.

¹⁶⁹ Apan kung ang mensaheng pentecostal mao na ang kaulahiang mensahe...Nga mao ang, pagpakamatarung, pagpakabalaan, og ang bautismo sa Espiritu Santo, ang kaulahiang tulo ka mga mensahe, ang maong kaulahiang tulo ka mga kapanahonan sa iglesia ang nagalangkob sa hingpit nga Pagkatawo Na Usab.

¹⁷⁰ Sama ra sa diha nga ang usa ka babaye, igapanganak na niya ang iyang bata; ang aktuwal nga unang mogawas mao ang tubig, ang sunod mao'y dugo, og ang sunod mao'y kinabuhi.

¹⁷¹ Kaniadtong gipatay nila si Jesus didto sa krus, dunay migawas nga materyal gikan sa Iyang lawas, aron mahimo ang bag-ong...aron mapahigayon ang—ang Bag-ong Pagkahimugso. Pagkadughang nila sa Iyang kilid, mibugwak ang Dugo ug tubig, ug miingon, “Nganha sa Imong mga kamot ginatugyan Ko ang Akong Espiritu.” Ang mibugwak gikan sa Iyang lawas mao ang tubig, Dugo, og Espiritu.

¹⁷² Karon, nagasulti kaninyo ang Unang Juan 5:7 mahitungod niana, “Adunay tulo nga nagapamatuod sa Langit, ang Amahan, ang Pulong (nga mao si Cristo,) ug ang Espiritu Santo.” Ug nagakahiusa kining tulo; dili sila usa ra, kondili nagakahiusa sila. Ug adunay tulo nga nagapamatuod...O, “Usa ra sila,” ang buot kong ipasabot. Nasayup ako dinha. “Ug ang tulo nga nagapamatuod sa yuta, mao ang tubig, Dugo, ug Espiritu, ug nagakahiusa sila.”

¹⁷³ Mahimo ra kang mabalaan nga dili gipakamatarung. Ug mahimo pud kang mapamatarung nga dili gipakabalaan. Mahimo ra usab kang mabalaan nga wala nadawat ang Espiritu Santo. Eksakto gyud kana.

¹⁷⁴ Ang mga tinun-an, diha sa Juan 17:17, gipakabalaan ug gikahatagan sila og gahum aron sa pagpagula og mga yawa, apan wala gihapon nakabaton sa Espiritu Santo. Kita n'yo? Oo. Kinahanglan pa nilang moadto sa Pentecostes, ug maghulat hangtud nga mokunsad ang Espiritu Santo.

¹⁷⁵ Dinha kon diin gipakita ni Judas ang iyang kolor. Nakita ba ninyo kon giunsa pagbuhat nianang espiritu nga makasulod pinaagi sa pagpakamatarung, og pagpakabalaan? Apan pag-abot na sa katapusan, gipakita ra niya ang iyang kolor. Kita n'yo? Husto kana.

¹⁷⁶ Karon matikdi, ha, ug ania na kita sa katapusang panahon. Ug ang espirituwal nga Eva, sama lang sa nat-...maingon nga gisaraan kaniadto ang Hebreohanong Eva, ang Hebreohanong pangasaw-onon gisaraan 'sab nga mobalik ang Pulong. Ug ang espirituwal nga pangasaw-onon nga gikan sa Pentecostes, sa dihang nahulog siya didto sa Nicaea, dayon gisaraan siya nga

sa kaulahiing mga adlaw mobalik ang Pulong pag-usab. Karon moingon mo, kung ingon-ana . . .

¹⁷⁷ Kung gusto n'yo og usa pa ka Kasulatan, ablihi ninyo sa, Pinadayag 10. Ug ang ingon, “Sa takna, sa panahon sa—sa kaulahiing manulonda, sa diha nga ang ikapitong manulonda (ikapitong mensahero) mosugod na sa pagtingog, ang tinago sa Dios matapos na.” Kita n'yo? Ang pagpasig-uli balik ngadto sa Pulong! Miingon ang Biblia nga kining mensahero sa kaulahiing mga adlaw, “Ipasig-uli niya sila balik ngadto sa orihinal nga Pagtoo pag-usab, balik ngadto sa Pagtoo sa mga amahan.” Apan sa hunahuna n'yo dawaton kaha nila Kini? Dili, sir. “Sa kaulahiing mga adlaw, ipasig-uli Niya ang orihinal nga Pulong pag-usab,” maingon sa gikasulti Niya sa Malaquias 4.

¹⁷⁸ Apan gisurender sa babaye. Karon, gisurender niya kana nga Pulong didto sa Nicaea. Maingon nga gisurender ni Eva didto sa Eden; gisalikway usab sa maong Eva ang sa iyaha didto sa Kalbaryo. Ug ginasalikway pud Kini sa Nicaeahong grupo sa kaulahiing mga adlaw, mao ra gihapon. Grabe!

¹⁷⁹ Apan sa dihang miabot ang Pulong diha sa tawhanong lawas, ang babaye, si Eva, ang Hebreohanong iglesia, ang inahan sa tanang espirituhanong buhi kaniadto, gisalikway niya Kini. Siya'y patay na kaayo, tungod sa iyang mga tradisyon ug mga dogma, mao nga wala niya Kini makita. Mao man usab kining usa, eksakto gayud. Oo.

¹⁸⁰ Wala nila makita Siya kaniadto, ang buhing Pulong nga napadayag diha sa unod, pinaagi sa gikasaad nga Pulong. Nagsaad na ang Pulong nga buhaton kining mga butanga. Gihimo ang saad, nga mamahimo kining ingon niini sa kaulahiing mga adlaw. “Maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo.” Karon matikdi kung unsay nahitabo sa Sodoma. “Maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo.” Kita n'yo? Matikdi n'yo kung unsay nahitabo kaniadto. Kita n'yo? Karon, miingon Siya nga mao ra sa gihapon ang mahitabo, ug nagakinabuhi na kita nianang adlaw. Bueno, ug puede ako, sigurong, magpahinungod og unom ka gatus ka mga saad nga sama niana, gikan sa Kasulatan, sa paghisgot lamang niini. Kita n'yo? Karon, apan, gisalikway nila Kini.

¹⁸¹ Nagpabilin siya sa mga tradisyon ug mga pangpuli, imbis unta nga sa—sa . . . Nagpabilin siya sa pangpuli nga dugo, imbis unta nga sa tinuod nga Dugo. Si Jesus, ang Pulong, miingon, sa dihang napadayag Kini ngadto sa babaye, “Tungod kay nagpabilin siya sa niini nga mga tradisyon . . .” si Jesus, ang napadayag nga Pulong, miingon ngadto sa pangasaw-onon, sa Hebreohanong pangasaw-onon, “Tungod kay nagpabilin ka sa

imong mga tradisyon, imong gipaka-walay pulos ang Pulong sa Dios nganha kanimo. Dili na Kini moepekto.”

¹⁸² Karon mao kana’y hinungdan karong panahona, nga, ang—ang mga rebaybal nga angay unta nga aduna kita, nagkaaduna hinoon kita og pang-denominasyon nga mga rebaybal. Wala na kita’y tinuod nga pagpukaw. Wala, wala, wala. Wala na, sir. Ayaw n’yo hunahunaa nga aduna kita og mga rebaybal. Wala na kita’y ingon-ana. Oh, aduna man sila’y minilyon ug minilyon ug minilyon nga mga miyembro sa iglesia, apan wala na gayu’y rebaybal. Wala. Wala na.

¹⁸³ Ang—ang Pangasaw-onon wala pa nagkaaduna og usa ka rebaybal. Kita n’yo? Wala pa’y rebaybal, wala pa’y pagpadayag ang Dios aron pukawon ang Pangasaw-onon. Kita n’yo? Nagapaabot pa kita niini sa karon. Ang gikinahanglan niini mao kanang wala pa mapadayag nga pito ka Dalugdog, aron pukawon Siya pag-usab, kita n’yo. Oo. Ipadala Niya kini. Gisaad na Niya kini. Karon matikdi.

¹⁸⁴ Karon, siya’y—ang iglesia’y patay na. Ug karon kung hikalimtan lang unta sa mga iglesia ang ilang mga kredo, ug hikalimtan ang ilang mga dogma, ug dawaton lamang ang Biblia, hangyoon ang saad, nan mahimo kining mopekto nganha kanila. Apan, kita n’yo, miingon si Jesus, “Kamo, tungod sa inyong mga tradisyon, ginahimo n’yong walay epekto ang Pulong sa Dios nganha kaninyo.” Bueno, mao ra kini sa gihapon karong panahona sa espirituwal nga Eva, kita n’yo, ang espirituwal nga pangasaw-onon sa karon, kono, ang iglesia. Gamiton niya ang Pulong sa Dios, apan ayaw niya Kini dawaton. Ug nagadawat siya og mga dogma, hinoon. Busa, walay epekto ang Pulong kaniya, kita n’yo, tungod kay ginapaningkamotan man niyang ipasulod ang iyang kredo kauban sa Pulong, ug dili gyud kana magpulos. Karon, ang gikinahanglan nato karong panahona . . .

¹⁸⁵ Sige kong mabasa kini dinhi sa, *Herald of His Coming*, sa ulohan niini, “Nagkinahanglan kita og usa ka propeta nga mobalik! Nagkinahanglan kita og usa ka propeta nga mobalik!” Ug sa tan-aw ko, pagmobalik na siya, wala gyud sila’y mahibal-an mahitungod niini. Halos . . . Husto kana. Ingon na niana kini sa una pa, nakita n’yo. “Kinahanglan nato kini,” ang tanan na lang nga ginahisgotan n’yo, “ang kinahanglan nato usa ka propeta nga mobalik, nga magadala sa Pulong sa Ginoo, nga walay-kahadlok. Nagatoo kita nga gisaad kini sa Biblia.”

¹⁸⁶ Karon, kaila ko si Igsoong—Igsoong Moore ug sila, nga nangaon kami didto sa iyang balay, ug tanan na, ang editor niini. Ug siya ang pinaka buutan nga tawo nga—nga nagalakaw nga nagsul-ob og panit nga sapatos, sa tan-aw ko, usa sa pinaka buutan nga mga tawo. Apan, kita n’yo, nasayod gayud siya nga nagkinahanglan kita og ingon niana. Ug si Igsoong babayeng

Moore pud, usa sa pinaka buutan nga mga babaye, gamay'ng. . . luoy'ng gamay'ng tawo, ug nagasakripisyo sila.

¹⁸⁷ Ug mao kana ang usa sa pinaka-maanindot nga mga mantalaan sa natad sa pagpangmision, sa akong opinyon, ang *The Herald of His Coming*. Apan nahibaloan ninyo, nga sige nilang ginapahayag kana, “Nagkinahanglan kita og propeta! Nagkinahanglan kita og propeta!” Kita n'yo? Aba! Mao kana'y ginaingon nila.

¹⁸⁸ Ug dayon ania kita, karon, ug sama kagahapon ug karong adlaw, ginapahayag sa radyo, nga. . .ug sa mga iglesia sa Baptist ug uban pa, nga, “Dili man nato kinahanglan nga magpakig-uban sa mga Katoliko, kondili medyo kinahanglan lang natong magpakig-fellowship kanila.” Kita n'yo?

¹⁸⁹ Ug dinhi mismo, nagagula ang mismong Mensaheng, “pagpahilayo kamo nianang makahilo nga butang!” Kita n'yo? Kita n'yo? “Unsaon man pagkakuyog sa duruha gawas kon sila magakauyon?” Dili man puede mag-uban ang Kahayag ug kangitngit. Pagnagaabot ang Kahayag, nagahawa ang kangitngit. Kita n'yo? Dili niini mahimong. . .Kini ang pinaka gamhanan! Dili mo mahimong walaon ang Kahayag, pinaagi ug kangitngit. Apan mahimo mong walaon ang kangitngit, pinaagi ug Kahayag. Husto kana. Ug Siya ang Kahayag, ug Siya ang Pulong. Kita n'yo? Karon, mao kana, diretso mismo. Dili mo mahimong mapabakak Kini o mapabuhat og unsa mang sayup. Diretso Kini mismong nagabalik sa punto. Oo, sir.

¹⁹⁰ Sama ra sa usa ka tawo nga nagasugod, pagpaninguhang makiglalis kanimo; nakahibalo ka kung asa ka mobarug, nahibalo ka kung unsay iyang ginatoohan.

¹⁹¹ Sama lang nga mikuha ka og usa ka rabbit ug gibuhian kini sulod sa usa ka tangkal, ug gitabonan mo ang tanang bangag. Bantayan mo gyud ang pultahan; tungod siguradong mobalik kini. Ingon niana lang ka simpli. Imo siyang kulongan. Kita n'yo? Siguradong mobalik gyud siya sa pultahan, tungod kay mao lang kana ang bugtong paagi nga makagawas siya. Ipagawas niya ang iyang ulo *dinhi*, ug halos mabali na ang iyang liog; ug moanha *dinha* dapit, og *dinha* dapit. Pagtindog lang ug matikdi siya, ug mobalik gyud siya. Kita n'yo? Kana lang.

¹⁹² Ingon niana lang ang buhaton. Pagpabilin mismo nianang Pulong. Isinggit n'yo man, ang inyong mga kredo, nga halos mabali na ang inyong liog, apan kinahanglan n'yong mobalik mismo niining Pulong. Kita n'yo? Oo, sir. Mao lang gayud Kana.

¹⁹³ Karon, kita n'yo, sila—sila—sila—dili nila gusto Kini. Dili nila gusto ang Pulong sa Dios. Tungod kay nagpabilin man siya sa iyang mga tradisyon, gipa-pabilin niya ang Pulong sa Dios nga walay epekto.

¹⁹⁴ Mao ra gihapon karon, sa espirituwal nga Eva. Dili niya gusto. . .Gusto niyang ipapabilin ang iyang mga tradisyon, ug

nagapahilayo sa Pulong sa Dios. Nagapanghawid na usab siya sa mga denominasyon, ug sa ilang mga kredo ug sa mga tradisyon sa iyang mga elder, imbis nga dawaton ang Pulong sa Dios.

¹⁹⁵ Ug sa diha nga ang saad sa Pulong, para sa kaulahiing mga adlaw, gihatud kaniya, ayaw niya dawaton Kini, tungod, sa iyang mga tradisyon, sama sa gibuhad sa Hebreohanong pangasaw-onon. Ang tinuod nga Pulong, bisan og napadayag na, gipamatud-an, og gipanghimatud-an, ayaw niya dawaton Kana. Nganong ayaw man niya dawaton? Tungod kay mao man kana ang iyang tipo. Dili niya mahimo kana. Husto kana. Dili niya mahimong dauton ang iyang tipo. Kita n'yo? Ug gisulti-nangdaan nga buhaton niya kini, busa unsaon mo man pagpahilayo kaniya gikan sa maong butang?

¹⁹⁶ Karon ang butang lang nga buhaton mao ang magmalipayon nga nakasulod ka na. Kana lang. Maghulat na lang. Oo.

¹⁹⁷ Nagsaad ang Dios, nga sa kaulahiing mga adlaw, Iyang ipadayag ug panghimatud-an ang Iyang Pulong ngadto kaniya, ug sa gihapon dili niya pagadawaton kini. Ang tanan nga, gikasaad sa Dios kaniya, pinaagi sa Iyang mga alagad, ang mga propeta. Nagsaad ang Dios, pinaagi ni Jesus Cristo. Nagsaad ang Dios, pinaagi ni Joel. Nagsaad ang Dios, pinaagi ni Pablo. Nagsaad ang Dios, pinaagi ni Malaquias. Si Juan. . . Nagsaad 'sab ang Dios, pinaagi ni Juan nga tigpadayag, og kanilang tanan nga mga propeta, sa ingon ka eksakto kung unsa ang kaulahiing Mensahe para kaniya. Karon, kung gusto n'yong isulat ang mga niini; siyempre, nahibalo na man mo tanan niini: kang Jesus, Juan 14:12; ug kang Joel, Joel 2:38; kang Pablo, Ikaduhang Timoteo 3; kang Malaquias, ika-4 nga kapitulo; ug kang Juan nga tigpadayag, Pinadayag 10, ika-dise-siete, uno hangtud sa ika-dise-siete. Kita n'yo, eksakto gayud kung unsay nagakahitabo karon! Ug, para sa iglesia, unsa man Kini? Ang nagpakatawo nga Pulong nga nahimong unod taliwala sa Iyang mga tawo pag-usab! Kita n'yo? Ug ayaw nilang toohan Kini.

¹⁹⁸ Kahibalo ba mo kung unsay gisulti ni Jesus sa dihang nakita Niya nga Iyang . . . sa dihang gibuhatan Niya sila og mga milagro sa atubangan nila, ug nagpamatuod nga Siya'y Dios? Gipamatud-an kana, sa kung unsay Iyang ginabuhad. Kung unsa Siya. Nabuhad Niya sa ingon ka eksakto. Siya—miingon Siya ngadto kanila, ingon Siya, "Oh, ikaw, Capernaum, nga gituboy ngadto sa langit, kung ang mga buhat. . . kung ang maong gamhanang mga buhat gibuhad pa unta sa Sodoma, nga gibuhad diha kanimo, nagabarug pa unta kini karong adlaw." Husto kana. Ug didto sa Capernaum, wala gayud Siya nagbuhad og unsa man gawas sa pagpang-ayo og pipila ka mga tawo, ug gisaysay kanila ang mga tinago sa ilang mga kasingkasing, ug mibiya na. Uh-huh. Kana lang. Kita n'yo?

¹⁹⁹ Wala gani sila mahibalo kung unsa ang gamhanang mga buhat. Ginahunahuna nila nga kana'y kinahanglan nga usa gayud ka bantugan nga programa kon diin motindog ang tanang tawo, ug ang maghuhukom magahimo og usa ka pagpanulti, ug—ug motugtog ang mga banda, ug magakayab-kayab ang mga bandila, ug ang—ug ang maayo'g-binistihan nga mga kababayan-an, ug ang ilang...ug nanaghulat sila, ug ang tanang mga may Ph.D, mga may LL.D, ug ang dagkung, hatag-as nga mga kalo, ug pinabaliskad nga mga kuwelyo, ug tanan na, kinahanglan nilang tanan nga mosulod. “Bantugan kana nga butang.”

Nagaingon ang Dios, “Binuang kana.”

²⁰⁰ Ug magpatungha ang Dios og usa ka kabus ra butang nga wala gani kahibalo sa kalahian sa ABC, halos, ug magbuhat og butang nga magapadilaab sa tinuod nga Iglesia. Ug moingon ang tanang uban pa kanila, “Usa ra ka pundok kana sa mga holy-holler.” Ginatawag *Kana* sa Dios nga “halangdon,” ug ginatawag pud Kini sa kalibutan nga “kabuangan.” Ang *kanang* ginatawag sa kalibutan nga “halangdon,” ginatawag kana sa Dios nga “kabuangan.” Kita n'yo, bali-bali lang. Kita n'yo? Ug ang butang nga gikasaad sa Dios, pagabuhaton gyud sa Dios ug gibuhat na. Kita n'yo? Ania na kita.

²⁰¹ Karon, sa gihapon, nagapabilin ra siyang sama kaniadto, ang Hebreohanong Eva. Ayaw gayud niyang toohan kana. Banhawon mo man ang patay; bisan makita pa ang Espiritu sa Dios. Mikanaug si Jesus, og gipanghimatud-an ang Iyang Kaugalingon ingon nga Anak sa Dios. Una, misugod Siya sa pagwali. Bueno, gihunahuna nila, “Bueno, medyo usa ka salikwaut nga Tawo. Kinsa ba, gayud Siya?” Bueno, mahibaloan mo na lang, hinay-hinay nang mosulti ang mga tawo . . .

²⁰² Siyempre, miingon na sila, kaniadto, sa dihang miabot ang Iyang mag-uuna, nga si Juan, miingon sila, “Ikaw ba ang Mesias?”

²⁰³ Ingon siya, “Dili. Apan nagatindog Siya sa inyong taliwala sa kung asa man.” Uh-huh. Kita n'yo? Ngano man? Nasayod man siya, pagmahayag na ang iyang mensahe, nasayod siya kung unsay iyang buhaton. Nasayod siya kung unsay pagabuhaton niya.

²⁰⁴ Sama lang ni Noe kaniadto nga sige niyang gibantayan si Enoch. Pagka-kayab ni Enoch, miingon si Noe, “Mas maayo nga magpahiduol na sa arka. Haduol na ang panahon.” Sigeng gibantayan ni Noe si Enoch. Kita n'yo?

²⁰⁵ Ug gibantayan pud ni Juan ang ilhanan nga gisulti ni Jesus kaniya, o gisulti sa Dios kaniya, nga pagabantayan. Ingon siya, “Ania Siya nagatindog dinhi mismo karon, sa kung asa man sa taliwala ninyo. Wala ko makaila Kaniya, apan mailhan ra nako Siya.”

206 Sa pagtindog niya didto, miingon sila, “Dili ba ikaw ang Mesias?” Miingon, “Gipadala kami gikan sa mga punoang-buhatan.” Uh-huh. Miingon, “Ang mga anciano, ug ang tanan, ang nagpadala kanamo dinhi. Kung ikaw ang Mesias, nganong dili man ka moadto ug ipaila ang imong kaugalingon didto, dili dinhi sa niining pundok sa mga ingon niini! Kinahanglan moadto ka didto ug ipaila ang imong kaugalingon.”

207 Ingon siya, “Dili man ako ang Mesias.” Ingon siya, “Ako mao ang tingog nga nagasinggit sa kamingawan.”

208 Milabay ra kadto ibabaw sa ilang ulo sa ingon nga mahimo niini. Wala gyud sila’y hingsayran og unsa man bahin niini, kita n’yo, ug bisan pa niana nagapaabot gyud silang tanan kaniya nga moabot. “Apan dili kini mamahimong usa ka lalaki nga sama niana. Oh, grabe, makalilisang kaayo kana!”

“Sa unsang eskwelahan ka ba gikan?”

“Wala.”

“Aduna ka ba’y fellowship card?”

“Unsa man diay na?” Kita n’yo?

209 Siya’y dinihogan sa Dios. Ingon siya, “Adunay usa ra ka butang nga aduna ako. Ang atsa napataup na sa gamot sa kahoy.” Karon, mao lang kana ang iyang—mao lang kana ang aduna siya. Nagpakisulti siya sa mga termino sa usa ka tagalasang, dili nga sa mga termino sa usa ka ministro; kondili mga bitin, ug mga atsa, ug mga kahoy, og uban pa. Siya—wala siya nagpakigsulti sa mga termino pang-simbahan.

210 Apan miingon si Jesus nga wala gayud ni usa ka propeta nga sama niya. “Wala pa’y tawo nga natawo sa babaye, nga sama kaniya, hangtud sa iyang adlaw.” Husto kana. “Labaw pa siya kay sa usa ka propeta” Siya mao ang mensahero sa Pakigsaad, nga mibarug mismo tali sa—sa duha ka nagasulod, nga dispensasyon. Kita n’yo? “Labaw pa kay sa usa ka propeta.”

211 Ug busa niadtong panahona—niadtong panahona wala nila siya hiilhi. Wala nila siya masabti. Siya’y medyo salikwaut man gud nga matang sa tawo, mao nga wala nila siya gitagad, kita n’yo.

212 Dayon sa dihang miabot na si Jesus, kaniadto, ug siguradong dili nila Siya pagadawat, kining Anak sa panday, walay unsa man nga sama niana, nga may mahugaw’ng ngalan sa luyo Niya, ingon nga “ilehitimo.” Ug, Siya, ayaw nilang makigkita sa usa ka Tawo nga sama niana.

213 Apan, apan tan-awa kung unsay gibuhath sa Dios. Gipili Niya ang mga walay-nakat-onan, mga kabus, mga mangingisda, mga lasangnon, mga mag-uuma, ug mga bigaon, ug gipasagdan ra nga manglingkod didto ang mga tawong hataas og katungdanan. Ngano man? Unsa kaha? Nganong gibuhath man Niya kadto? Nganong gibuhath man Niya ang ingon-nianang butang?

Mahunahuna ba ninyo? Tungod kay naila man Siya niadto nga mga tawo ingon nga mao ang Pulong. Karon matikdan 'sa nato sila sa makadiyut lang.

²¹⁴ Ania ang usa ka tigulang walay-hibangkaagan nga mangingisda, nga dili gani makasulat sa iyang ngalan. Miingon ang Biblia nga siya'y "walay-hibangkaagan ug walay-nakat-onan." Gidala niya ang iyang mga isda ug gibiyaan ra ang mga niini. Miadto siya didto ug gisuta kung bahin ba sa unsa kadtong tanan nga kabanha. Apan sa kinasuloran niya, nasayod siya nga miingon ang Biblia nga ang Mesias. . . Ang tanang mga Hebreohanon nanagpaabot gyud sa Mesias, tungod kay aduna ma'y usa ka butang nga sumala sa Kasulatan ang mahitabo pagmoabot na Siya.

²¹⁵ Aduna na'y daghang mga mesias, ang nanagpanungha ug miingon, "Ako mao Siya," ug gipasimang sila, ang mga gatusan, ug—ug nangalaglag sila ug tanan na. Apan, kita n'yo, para lang kadto nga pagaduhaduhaan ang Usa nga tinuod pagmoabot na Kini.

²¹⁶ Aduna na pud kita'y mga kupo ug mga sinina ni Elias kaniadto, ug tanang uban pang butang, apan kana—kana'y—kana'y—kana'y aron lang pagaduhaduhaan ang tinuod nga butang pagmoabot na siya. Kita n'yo? Husto kana. Ang tanan na nga matang sa mga tawo nga nanagsul-ob ug mga kupo ug ingon-anang mga bisti, gipanglubong sila nga binalit-ad ang tanan na lang nga matang sa tabon, ug tanang uban pa. Dili kana. . . Kana—nagapanghimatuod lamang kana. Sama sa usa ka mini-nga-dolyar, nga nagapakita lang nga aduna gyu'y usa ka tinuod sa kung asa man, kung makit-an lang ninyo kini. Kita n'yo?

²¹⁷ Busa ania Siya nga nagaabot. Karon atua kining mga tawong hataas og katungdanan, ug sila'y mga nahilambigit na gyud og ayo sa ilang pangpuli! "Aba," ingon sila, "karon, kung moabot man ang Mesias, sigurado gayud nga moadto Siya kang Caifas. Moadto Siya sa among denominasyon. Moadto gyud Siya sa mga Fariseo." Miingon usab ang mga Saduceo, "Dahum n'yo lang kana! Siguradong sa mga Saduceo gyud Siya moadto." Ug mao kadto sila, kita n'yo, mao ra gihapon ang aduna kanila niining panahona, karon.

²¹⁸ Apan sa dihang miabot Siya, pagkalahi kaayo. Miabot Siya, oh, nga sukwahi kaayo sa gidahum nila, apan miabot Siya nga sumala mismo sa Pulong. Ug wala sila mahibalo sa Pulong.

²¹⁹ Tugoti kong isulti kini, og ayo, aron inyong. . . motuhop kini sa kinasuloran. Gusto kong masabtan n'yo kini. Mao kana'y problema kaninyo karong panahona, kita n'yo, wala kamo mahibalo sa Pulong! Kita n'yo?

²²⁰ Miingon si Jesus, "Makamao kamong moila sa dagway sa kalangitan, apan dili kamo makaila sa mga ilhanan sa kapanahonan."

Miingon, “Aduna man kami og Moises.”

221 Mao nga, miingon Siya, “Kung nakaila kamo kang Moises, nakaila unta kamo Kanako.” Wala man sila nakaila kang Moises, ug mao nga wala gyud sila makaila. Ang naila lang nila mao ang kredo nga ilang hinimo-himo.

222 Karon atong hisgotan kining tigulang nga mangingisda. Gibutang niya ang iyang basket. Gihapuhap niya ang iyang balbas, ug miadto didto, “Nagatoo ko nga akong makita kung Kinsa kana.”

223 Miingon ang igsoon niyang lalaki, “Ari ka. Adto ta didto.” Miingon, “Kana ang mao gihapon nga Lalaki. Mao kana ang Lalaki nga giingon nila niadtong miaging adlaw . . . Nagpabilin ako tibuok gabii uban Kaniya kagabii. Kaila ba ka kang Juan, kadtong ginaingon ko kanimo?”

224 “Oo, kadtong ilahas nga tawo didto! Oo, nadungog ko ang mahitungod kaniya.” “Bueno,” ang tigulang nga si Simon, kabalo mo, miingon, “Nadungog ko ang mahitungod kaniya didto. Oo, didto man ko, duha o tulo na ka bulan ang milabay, didto dapit. Oo.”

225 “Bueno, ingon niya . . . Ug usa niana ka adlaw nagatindog siya didto, nagsulti siya og usa ka talagsaong butang. Ang ingon niya, ‘Kabalo mo, ania Siya karon nga nagaabot na!’ Miingon sila, ‘Giunsa mo man pagkahibalo?’ Pagtan-aw niya didto; usa lamang ka ordinaryong Lalaki nga nagatindog didto. Miingon siya, ‘Nakita ko ang Espiritu sa Dios, sama sa usa ka salampati, nga mikunsad. Nadungog ko ang usa ka Tingog nga nagaingon, “Kini mao Siya. Kini ang pinalangga Kong Anak nga Kaniya Ako may kalipay nga mopuyo.”’ Pagkahuman miubog dayon siya sa tubig ug gibautismohan Siya, og uban pa. Bueno, didto, ingon siya nga nakaila siya Kaniya.”

226 “Oh, wala ko kabalo,” ang ingon ni Simon. “Nadungog ko na ang tanan bahin niana, sa makadaghan nang higayon.” Apan ania siya nga nagaadto didto. Ug sa kinasuloran sa iyang kasingkasing atua gyu’y usa ka gipili-nang-daan nga binhi. Kita n’yo? Mao’y giingon ni Jesus. Oo. Miadto na siya kang Jesus. Milakaw siya paingon didto. Miingon, “Moadto ko sa panagtigum ug tan-awon lang.” Miabot siya didto.

227 Nagatindog si Jesus didto, nga usa lamang ka ordinaryong Lalaki. Miduol. Ingon Niya, “Aba, ang imong ngalan mao si Simon. Ug ang ngalan sa imong amahan mao si Jonas.” Nagpakuyos gyud kadto kaniya. Ngano man? Kanang gamay’ng, binhi sa Kinabuhing Walay Katapusan naigo man didto. Oo, sir.

228 Miingon, “Kadali lang! Giunsa man kana? Wala Ka pa man nakakita kanako sukad-sukad. Wala Ka usab nakaila sa akong amahan, tungod kay dugay na man nga mga tuig siyang namatay. Apan ania Ka nga miabot, nga ginasultihan ako niana? Karon, nasayod ko nga ang Biblia nagaingon . . .” Karon, dili

kana ingon nga mobalik pa sa kung unsay ginaingon sa anciano. “Apan miingon ang Biblia nga ang Mesias mamahimong usa ka Propeta. Ania na Siya. Mao kana Siya.”

²²⁹ Usa niadto ka adlaw miagi Siya sa Samaria, nagpaingon didto uban ang usa ka pundok sa mga Judeo. Gibiyaan Niya sila. Ug migawas kining luoy’ng, mahugaw’g-dungog nga babaye, tingali usa siya ka maanyag nga dalaga kaniadto, kabalo na mo. Ug napasagdan ra siya sa dalan, ingon nga usa pa ka bata. Ug mipaingon siya didto. Tingali aduna siya’y ginahunahuna. Miabot siya didto ug gipaubos niya ang timba. Ug hinay-hinay niyang gipaubos ang maong pangkalos, kabalo na mo, aron magkalos og tubig. Ug nadungog niya ang usa ka Tawo nga miingon, “Hatagi Ako og mainom.” Mitan-aw siya sa palibot, ug atua naglingkod ang usa ka medyo hamtong na nga Judeo.

²³⁰ Miingon siya, “Aba, dili ba usa man Ikaw ka Judeo? Dili Mo puedeng buhaton kana. Dili baya nabatasan para Kanimo nga makig-estorya kanako. Usa man ako ka Samaritanhon.”

²³¹ Ingon Niya, “Apan kung nasayod ka lang kung Kinsa ang imong gikaestorya, mohatag ka . . . mohangyo ka gayud Kanako nga hatagan ka og mainom.”

²³² Miingon, “Asa man ang Imong timba?” Kita n’yo? “Asa man ang Imong pisi?”

“Bueno,” ang ingon Niya, “ang Tubig nga Akong ginahatag mao’y Kinabuhi.”

²³³ “Unsa?” Kita n’yo? “Aba,” ingon ang babaye, “aba, gusto gyud ninyong magsimba sa Jerusalem. Ug ang among mga amahan nagasimba . . .”

²³⁴ “Oh,” ingon Niya, “husto kana, apan,” miingon, “kami nga mga Judeo nasayod man sa kung unsay among ginasimba. Apan,” miingon, “kabalo ka, moabot ang panahon sa dihang—sa diha nga ang mga tawo dili na magasimba sa Jerusalem o sa niining bukid.” Ingon Niya, “Sila’y—magasimba na sila sa Dios diha sa Espiritu, tungod kay usa man Siya ka Espiritu, Espiritu ug Kamatuoran.” Bueno, hinay-hinay na siyang naghunahuna niadto, kabalo mo.

Ug ingon Niya, “Lakaw ug kuhaa ang imong bana ug balik dinhi.”

Ingon siya, “Akong bana? Wala man ko’y bana.”

²³⁵ “Aba,” miingon, “tinuod kana.” Miingon, ingon, “Aduna ka na’y lima nga gikaipon-ipon, ug aduna ka’y pang-unom karon.” Ug ingon pa, “Nagkaaduna ka na og lima. Ug—ug, ikaw, kabalo ka. Tinuod ang imong giingon.”

²³⁶ Matikdi! Unsa man kadto? Miigo kadtong Kahayag niana nga binhi. Dugay na kining naipugas didto, nga gilitok kaniadto sa Dios. Oo, sir.

237 Ang binhi anaa na diha sa yuta. Sa dihang gihiklin sa Dios ang tubig, ug giigo kini sa adlaw, migitib kini. Husto kana. Kita n'yo? Kana lang ang gikinahanglan niana, ang adlaw. Nagkinahanglan lang ug kahayag. Oo, sir.

238 Ug dayon sa diha nga ang Balaang Espiritu, diha Kaniya, gihiklin usab ang kaniadtong kinabuhi sa maong babaye, ug gipakita kini kaniya, giigo kini sa nianang Kahayag. Ingon siya, "Sir, naila ko nga Ikaw usa ka Propeta." Ingon siya, "Karon, nasayod kami, nasayod ko niini, nga pagmoabot na ang Mesias, mamahimong ingon-niana gayud Siya. Ug wala pa kami nagkaaduna og usa ka propeta sulod na sa gatasan ka mga katuigan. Wala pa gyud kami nagkaaduna og usa ka tinuod nga propeta, sulod sa gatasan ka mga katuigan." Ug ingon pa siya, "Kung giunsa Mo pagsaysay kanako ang mahitungod sa akong bana, ug gisaysay kanako kung pila na ka lalaki ang akong gikaipon, ug uban pa. Aba," miingon, "Wala ko makasabot niini." Miingon, "Pagmoabot na ang Mesias, bueno, pagabuhaton man Niya ang ingon-niana. Apan si Kinsa Ka man?"

Ingon Siya, "Ako mao Siya."

Mao na kadto. Kita n'yo? Usa ka bigaon!

239 Ug mitan-aw sa palibot ang mga sacerdote ug miingon. . . Bueno, kinahanglan man nilang motubag sa ilang kongregasyon. Miingon, "Ayaw mo pagpatonto niana nga tawo. Siya'y—siya'y giyawaan. Kana lang." Karon, mao kana ang kalahian. Mao ra gihapon kana karong panahona. Kita n'yo? Mao ra gihapon sa karon, nga nagakatukma gayud. Oo. Oo, sir.

240 Ang maong babaye, nasayod siya, tungod kay giigo man Kini sa Kahayag. Ilang na- . . . Silang mga mangingisda, mga lasangnon, mga mag-uuma, mga maniningil-og-buhis, og mga bigaon, nakita gyud nila diha Kaniya kung unsay gikasulti sa yanong mga Kasulatan nga Iyang pagabuhaton. Ug wala makakita ang mga Fariseo, tungod sa ilang tradisyon. [Mihunong si Igsoong Branham ug nagasinyas sa kung unsang paagi. Positibo nga miuyon ang kongregasyon—Ed.] Dili nila makita, tungod sa ilang mga tradisyon. Apan ang bigaon, mga mag-uuma, ug silang tanan, nakita nila Kini, ang tanan nga gipili-nang-daan. Sa diha nga nagakahanaw ang mga pagduhaduha, nagatubo usab ang binhi. Husto kana.

241 Unsa ma'y gibuhatsa sa babaye? Miingon ba siya, "Malipayon ako nga nahimamat ko ang Mesias"? Oh, dili ingon niana, igsoon. Miadto dayon siya sa siyudad. Nalimtan na gani niya ang tubig. Ingon siya, "Umari kamo, tan-awa ninyo ang usa ka Tawo Nga nagsulti kanako sa mga butang nga nabuhats ko. Dili ba kini mao man ang mismong butang nga ginaingon sa Kasulatan nga buhaton sa Mesias? Dili ba mao man gayud kini?" Ug nakita sa mga tawo didto ang mao gihapong butang.

²⁴² Sama sa giingon ni Jesus, sa San Juan 14:12, nga mahitabo kana pag-usab. Giingon Niya usab kana sa Lucas, sa dihang miingon Siya, “Maingon sa nahitabo kaniadto sa mga adlaw ni Noe.” Daw sa unsa nga gipadayag sa Dios ang Iyang Kaugalingon diha sa usa ka Tawo, ug gisulti kung kinsay anaa sa luyo Niya; ug kung unsay gibuhathat ni Sarah, nga mikatawa sulod sa balongbalong. Ug kining tanang mga Kasulatan, ni Malaquias, ug uban pa, gisulti-nang-daan para sa kaulahiang mga adlaw. Miingon ang Mga Hebreohanon 4, sa diha nga “ang Pulong” mobalik. Giingon sa Malaquias 4 nga magabalik Kini pinaagi sa usa ka tawo. Miingon ang Mga Hebreohanon 4, “Ang Pulong sa Dios nagatugkad sa mga hunahuna nga anaa sa kasingkasing.”

²⁴³ Ug nakita nila nga nahitabo kana, ug milakaw ra palayo mismo niana. Ang ilang mga tradisyon ang nagtago niana ug gihimo kanang walay pulos. Bueno, ania na mismo kita. Kana lang. Uh-huh.

²⁴⁴ Kabalo mo, mahimo man Niya ang mao gihapon nga butang sa karon. Puede Siyang moabot mismo sa esena ug buhaton ang mao gihapon nga mga butang nga gibuhathat Niya kaniadto, sumala sa Iyang gisulti nga buhaton Niya. Kita n’yo? Nagsaad Siya nga buhaton kini. Nagsaad Siya nga buhaton Niya kini. Ug kung buhaton man Niya ang mao rang butang, nan ang mensahero sa Laodicea mao ang angay nga mobuhathat niini.

²⁴⁵ Ug dayon kung makita sa iglesia sa Laodicea nga nahitabo na kini, buhaton pud nila ang eksaktong gibuhathat sa Hebreohanong iglesia kaniadto sa sinugdan. Um-hum. Bisan unsa pa Kini ka gipanghimatud-an og ayo, oh, buhaton gyud nila kana, bisan pa man. Oh, grabe!

²⁴⁶ Karon, ginaingon Niini nga mahitabo kana. Magabalik kita sa orihinal nga Pulong, ug mahipadayag sumala sa gikasaad na, aron ipasig-uli ang Pagtoo, orihinal nga Pagtoo, pag-usab. Ug kung gipaila Niya ang Iyang Kaugalingon nga nagapuyo Siya taliwala sa Iyang mga katawhan, sa pagbuhathat niining mga butanga; mahimo ’sab gani Niyang magpa-retrato, aron mapamatud-an kana sa siyentipikanhong paagi. Ug dili gihapon nila toohan kana. Ug napamatud-an na, gitugotan ang mekanikal nga mata sa kamera nga makudakan Siya nga atua didto, kanang mao gihapon nga Haliging Kalayo, ang mao sa gihapon kagahapon, karon, ug hangtud sa kahangturan, Mga Hebreohanon 13:8, aron ipakita nga kana—bisan sa siyentipikanhong paagi, ug sa tanang uban pang pamaagi, mga ginghariang espirituwal nga siyentipikanhong napamatud-an. Bisan sa tanang pamaagi mahimo kana—kanang mapanghimatud-an, og gipanghimatud-an na kana.

²⁴⁷ Ug, kabalo mo, siguradong buhaton gyud nila ang mao gihapong butang. Tingali’g manglakaw ra ’sab sila mismo

palayo ug buhaton ang mao gihapong butang nga gibuhat nila kaniadto.

²⁴⁸ Oh, tabangan unta kita sa Dios! Oh, mohunong 'usa ta dinhi. Ug, tabangan unta kita sa Dios nga makasabot karon, mao'y akong pag-ampo, sa diha nga hisgotan na nato kini karon. Tungod kay, dili ko gustong langanon kamo pag-ayo. Tabangan unta kita sa Dios nga makasabot. Nagatoo ko nga siguro, samtang ania ang Espiritu kanato, mahimong karon na mismo nga Iya kitang tabangan nga maipadayag, og ablihan kini nga Selyo.

²⁴⁹ Basahon nato. Sa diha nga nakita nato ang kahimtang nga gikahimutangan sa iglesia, nakita pud nato kon asa kini gikan, nakita kung unsay gibuhat nila, og nakita kung asa unta ang angay'ng dangatan niini, nakita kini dinha, ug nakita usab kung unsa unta ang angay nilang pagabuhaton. Gibuhat mismo nila ang ingon niana. Karon nakita ba ninyo kon asa na kita? Kamo na ang maghukom. Dili ako makahukom. Responsibilidad ko lamang nga ihatud kining Pulong. Maingon lamang sa pagkahatag Niini kanako, ihatag ko usab Kini. Gawas kon gihatag na Kini kanako, dili ko usab Kini mahatag; wala na'y uban pa ang makahimo.

Ug sa pag-abli niya sa ikatulong selyo, nadungog ko ang ikatulong buhing-binuhat nga nagaingon, Umari ka ug tan-awa. Ug nakita ko, ug tan-awa ang usa ka maitum nga kabayo; ug ang nagkabayo niini may timbangan diha sa iyang kamot.

Ug nadungog ko ang tingog diha sa taliwala sa upat ka mga buhing-binuhat nga nagaingon, Kinahanglan usa ka denario ang bili sa usa ka litrong trigo, ug kinahanglan usa ka denario ang bili sa tulo ka litrong cebada; apan ayaw pag-unsaa ang lana ug . . . bino.

²⁵⁰ Karon, bitbit na sa Cordero ang Basahon diha sa Iyang kamot, og ginaablihan na ang Mga Selyo. Giablihan Niya ang una, ikaduha, ug karon ginaablihan Niya ang ikatulo. Ug samtang ginaablihan Niya kini, samtang ginaablihan kini sa Cordero, kining Ikatulong Selyo, ang ikatulong Buhing-binuhat . . .

²⁵¹ Karon pila man ang nakahibalo kung unsay hitsura sa ikatulong Mananap? Mora'g usa ka tawo. Ang una mora'g usa ka leon; ang usa pa mora'g usa ka baka, o usa ka laking baka; ug ang ikatulo mora'g usa ka tawo, usa kini ka tawo. Ug nadungog niya ang—ang buhing Binuhat, ang—ang Mananap. Ang Buhing Binuhat, nga sama sa usa ka tawo, miingon kang Juan, “Umari ka, og tan-awa kung unsa Kini, kining misteryo nga dugay nang gililong.” Sa tanang nangaging mga katuigan sa katubsanan, sukad pa sa pagkatukod sa kalibutan, gililong Kini sa ilalum

niini nga Selyo, kung unsay mahitabo. Karon, “Umari ka, og tan-awa kung unsa Kini.”

²⁵² Ug busa giablihan Niya Kini. Usa ka dalugdog ang midahunog, ug giablihan sa Cordero ang Mga Selyo.

²⁵³ Karon, ug miduol si Juan, aron tan-awon kung unsa Kini. Unsa ma’y iyang nakita? Nakakita siya og usa ka itum nga kabayo. Ug ang mangangabayo niini adunay usa ka pang-timbang, o timbangan, diha sa iyang kamot. Karon, mao kana’y unang butang nga iyang nakita. Sa dihang gisulti Kini sa Cordero, giablihan ang Selyo, dayon ang usa pa ka Mananap . . . Kita n’yo, nagpulihanay ang maong mga Mananap, sa pagsulti, “Umari ka, og tan-awa.” Ug si Juan, kon diin siya nagatindog, siguro sama *niini*, miduol siya dinhi dapit, sa dihang giablihan sa Cordero, ug nga miduol didto. Kasagaran . . .

²⁵⁴ Midahunog ang dalugdog, sama sa atong nakita sa Unang Selyo. Ug mitan-aw siya aron makita kung unsay nagakahitabo. Ug nakakita siya og usa ka tawo nga nagaabot, una, nga nakasakay sa usa ka puti nga kabayo. Ginatan-aw niya kini nga nagapangabayo. Ug padayon nga nagapangabayo, nakita siya ni Juan hangtud sa katapusan. Nakita niya kini nga mikanaug, sa iyang puti nga kabayo, nga adunay usa ka pana sa iyang kamot, ug ang—ang maong mangangabayo, ug wala siya’y mga udyong niini. Ug ang sunod nga butang nga iyang nakita, nagkaaduna na siya’y korona, og padayon nga nagapangabayo.

²⁵⁵ Dayon atong nahibaloan, pagkahuman niana, ang Cordero, ania na usab nga nagaabot, og nag-abli Siya og usa pa. Ug mitan-aw. Karon ania nagaabot ang usa—usa ka pulang kabayo. Kini nga tawo adunay espada diha sa iyang kamot. Padayon kini mismong nagapangabayo sa Kasulatan, kita n’yo, nga bitbit kining espada diha sa iyang kamot, ug aron mopatay ug wagtangon ang pagdinaitay gikan sa yuta.

²⁵⁶ Karon nag-abli ang Cordero og usa na usab ka Selyo. Lain na usab sa mga buhing Binuhat, nga sama sa usa ka tawo, ang miingon, “Umari ka, og tan-awa.” Karon miduol siya, aron tan-awon kung unsa kini. Ug pagtan-aw niya, adunay miabot nga usa ka mangangabayo nga nagsakay sa usa ka itum nga kabayo.

²⁵⁷ Bueno, kagabii, hingsayran nato nga ang mao rang mangangabayo nga nagsakay sa puti nga kabayo mao gihapon nga mangangabayo nga nagsakay sa pula nga kabayo.

²⁵⁸ Ug miingon ang Tingog, diha sa taliwala sa mga Buhing-binuhat, misinggit, nakita n’yo. Didto, miduol aron tan-awon kung unsa kadto: anaa Siya niining buhing Mga Binuhat. Ug nakita ni Juan kining itum nga kabayo.

Ug sa dihang . . . ang tingog diha sa taliwala sa upat ka mga buhing-binuhat misinggit, Kinahanplan usa ka denario ang bili sa usa ka litrong trigo, ug—ug kinahanplan usa ka denario ang bili sa tulo ka litrong

cebada; apan siguradoha nga ayaw pag-unsa ang—ang lana ug ang bino. (Kita n'yo?)

259 Kini nga mangangabayo, hisgotan 'sa nato siya. Kung namatikdan ninyo ang unang mangangabayo, kung kinsa siya. Ug hingsayran nato, kagabii, sumala sa Kasulatan, nga ang ikaduhang mangangabayo eksaktong mao ra gihapon nga tawo, nakasakay lang siya sa lain na usab nga kabayo. Unsa kaha'y nahitabo? Giusab niya ang iyang ministerio. Kita n'yo? Husto. Hingsayran pud nato nga usa siya ka anticristo, ug giusab niya ang iyang katungdanan.

260 Hingsayran nato nga sa dihang siya, una, nakasakay pa lamang sa puti nga kabayo, nahimo siyang usa ka doktrina. Karon, gitun-an nato ang matag usa niini nga direkta mismo sa Kasulatan. Kita n'yo?

261 Karon, matikdi ninyo kung asa na kita, karong gabhiona, sa nianang usa pa ka kapanahonan sa iglesia karon. Kita n'yo? Padulong na kita sa ikatulong kapanahonan sa iglesia karon. Kita n'yo? Ingon ka eksakto sa ikatulong kapanahonan sa iglesia, eksakto mismong sama sa ikatulong kabayo. Kita n'yo?

262 Karon, ang unang kapanahonan sa iglesia, unsa man kana? Adunay doktrina ang mga Nicolaita kaniadto, kita n'yo, nagasugod pa lang. Oo. Ug dayon, nahibaloan na lang nato, kining doktrinang Nicolaita, gipaluyohan kini ug direktso kining, nanglihok. Ug gipurongpurongan nila kini. Dayon, kining espiritu, nga anticristo, nagpakatawo. Kita n'yo? Ug nahibaloan nato, wala magdugay, nga nahimo siyang usa ka nagpakatawo nga yawa, usab; migula ang demonyo, ug misulod ang yawa.

263 Ug maingon nga ingon-ana nga matang kana nga iglesia, anticristong iglesia, nga nagalambo; mao man usab ang Pangasaw-onon nga nagaagi sa nagkalainlaing mga butang: nagaagi sa pagpakamatarung, pagpakabalaan, bautismo sa Espiritu Santo, ug nagapadayon ra mismo, kita n'yo, nga sama niana. Ang kalahian lang, una lang nilang nabatongan ang ilang rebaybal, ug mabatonan ra kana sa Iglesia sa kaulahian. Ang ilang unang tulo ka mga tuig... unang tulo ka mga hugna niini miagi sa mangiub nga kapanahonan; dayon ang ikatulo, tulo ka mga hugna usab, ang nagpagawas sa Iglesia; gikan sa pagpakamatarung, pagpakabalaan, bautismo sa Espiritu Santo, diha sa nagpakatawo nga Dios nga napadayag sa atong taliwala. Ania siya nga nagasulod, ingon nga anticristo, ingon nga mini nga propeta, dayon ingon nga mapintas na nga mananap, niadtong mangiub nga kapanahonan. Ug migawas ang Iglesia gikan nianang mangiub nga kapanahonan; sa pagpakamatarung, pagpakabalaan, bautismo sa Espiritu Santo, og ang nagpakatawo nga Pulong, sa karon. Ug nagakaus-us siya. Uh-huh. Nakita n'yo ba kana? Nagakaus-us siya. Nagapataas

ang Iglesia. Kita n'yo? Ingon niana kini ka hingpit kung unsa kini. Oh, pagkaanindot niini. Gusto ko gayud kini.

264 Mao ra gihapon kini nga mangangabayo, apan anaa lang sa lain nga hugna sa iyang ministerio.

265 Ang una nga hugna, usa ka puting kabayo, kita n'yo, siya'y usa lang ka magtutudlo, usa lang ka anticristong magtutudlo. Siya'y batok sa Pulong sa Dios.

266 Ug karon unsaon mo man sa pagkahimong usa ka anticristo? Ang si kinsa man nga ginapahingmakak nga matuod ang matag Pulong niini, ug matudloan sa mao gihapong butang, usa ka anticristo, tungod kay ginapanghimakak man nila ang—ang—ang—ang—ang Pulong. Ug Siya mao ang Pulong.

267 Karon, ang unang hugna, puti nga kabayo, siya'y usa lang ka magtutudlo, apan usa ka anticristo nga espiritu sa doktrina niini ug kinaiyahan niini. Mora'g inosente. Daw sa, dili kini makapasakit og usa man; og mao nga ginapasagdan lang. Sa ingon-anang paagi nga nagasulod si Satanas. Oh, siya'y usa gyud ka maliputon nga langgam.

268 Giingnan niya si Eva, miingon, “Karon, kahibalo ka nga nagatinguha ka og kaalam. Wala ka mahibalo kung unsay husto ug sayup.” Ingon pa, “Karon, kung naablihan lang ang imong mga mata, nan mahibalo ka unta.” Ug miingon, “Makalipay kaayo ang bunga. Maayo kini. Kini'y—makalipay kini sa mata. Kinahanglan mo nang dawaton kini karon. Wala ka pa kahibalo kon kini ba'y maayo, o dili, di ba?”

“Wala, wala ko kahibalo. Apan miingon man ang Dios nga dili ko buhaton kana.”

“Apan, oh, bueno, kabalo ko, apan . . .”

“Miingon ang Dios nga Iyang . . . mamatay kami.”

269 Ingon si Satanas, “Siguradong dili Niya kana buhaton.” Kita n'yo, pagkatam-is kaayo. Tan-awa kung unsay resulta niini.

270 Matikdi kining anticristo nga espiritu nga mitungha taliwala sa nahaunang iglesia, usa ka doktrina sa Nicolaita. *Nikao*, “pagpangdaug” sa mga ordinaryong tawo sa iglesia, nagahimo og usa ka balaang tawo. Oh, kini gayu'y ingon ka ino- . . . “Bueno, gusto lang namo og pagpakig-fellowship. Aba, nagkatibulaag man kamo dinhi; wala na man gud nagkahibaloay kung asa na ang usa'g usa. Siguro kinahanglan na natong magkaaduna og organisasyon ug mamahimong lahi. Kita n'yo, sige, hiusahon nato ang atong mga kaugalingon. Kinahanglan natong magtukod og usa ka kapunongan.” Ug ingon niana kana. Wala gyu'y ingon-nianang butang sama sa Christian Church of Methodist. Dili kana usa ka Iglesia; usa kana ka kapunongan. Ang Baptist, dili kana usa ka Iglesia; usa kana ka kapunongan.

271 Aduna lamang og usa ka Iglesia, ug kana mao ang mistiko nga Lawas ni Jesus Cristo. Ug natawo kamo pasulod Niana,

husto kana, pinaagi og predestinasyon. Husto kana. “Ang tanan nga gikahatag Kanako sa Amahan magaduol. Walay tawong makahimo sa pagduol gawas kon tawgon siya sa Amahan. Ug ang tanan nga gikahatag Niya Kanako, magaduol Kanako.” Busa, kana, ingon-niana kana. Iya lamang. . .

²⁷² Nagalingkod ang Cordero didto, nagahimo—nagahimo og pagpangaliya, hangtud nga ang kaulahiang usa nakasulod na. Magabagting ang gamay’ng kampanya, ug moadto Siya didto ug angkonon na ang Iyang mga panag-iya nianang panahona, kita n’yo, kana lang; dalhon na ang Iyang Iglesia Pauli, ang Iyang mga ginsakupan. Ug itambog Niya ang Iyang kaaway ngadto sa Linaw nga Kalayo, ug ang tanang mga ginsakupan niini usab paingon didto uban kaniya, ug mao kana. Dayon magalakaw na kita diha sa Milenyum.

²⁷³ Mao gihapon nga mangangabayo, karon. Niadtong unang hugna, siya’y mora’g walay limbong. Ug sa ikaduha, na, kung moadto ka sa medyo taas-taas pa, og diyutay kay sa niana; sa ikaduhang hugna niini, miingon ang Biblia nga siya’y “gikoronahan na.” Ug gikoronahan nila ang usa ka tawo, usa ka super-nga-tawo. Kita n’yo, gikoronahan siya! Ug, dayon, wala siya gitawag sa Biblia ingon nga usa ka papa. Gitawag siya sa Biblia ingon nga usa ka “mini nga propeta.” Ngano man? Oo. Siyempre, siguradong usa gayud siya ka mini nga propeta, tungod sa iyang anticristo nga espiritu, nga nagtudlo og pagka-anticristo batok sa orihinal nga Pulong. Tungod kay, kung nagtudlo siya batok sa orihinal nga Pulong, nan anticristo kana. Mao gayud. Ug ang Pulong Dios, kita n’yo, si Cristo. Bueno. Karon, human niana, hingsayran nato nga gipurongpurongan siya pagkahuman. Ug sa dihang gipurongpurongan na siya, bueno, siya’y mora’g walay limbong ug mora’g dili makahimo og unsa man. Siya’y usa ra ka buutang tawo.

²⁷⁴ Apan didto sa Konseho sa Nicaea kaniadto, gitukod kini, ug gihatag kaniya ni Constantine ang tanang kabtangan. Ug dayon unsa ma’y gibuhat niya? Pagkahuman siya, kita n’yo, si Satanas, gihatag kaniya ang iyang trono ug kagahum. Mao kana ang gisulti sa Biblia, ingon nga nahisgotan na nato kana.

²⁷⁵ Karon, ang sunod nga butang nga nahibaloan nato, nga kontrolado sa yawa ang tanang pulitika nga naglungtad na o magalungtad pa lang. Makita nato kana sa Mateo 4:11. Ug karon nahibaloan pud nato, dayon, nga si Satanas aduna na kaniya ang pulitika.

²⁷⁶ Apan ginapaningkamotan pud niyang angkonon ang Iglesia, mao nga miadto siya aron limbongan Kini. Nagkuha siya og iyang super-nga-tawo, gipalihok siya diha sa usa ka organisasyon, ug gipurongpurongan siyang “bikaryo,” kita n’yo, usa ka cristo. Cristo nga nanglihok puli sa Dios. Kita n’yo, kini nga tawo usa ka bikaryo, puli sa Dios. Kita n’yo? Pareho ra kini

sa, “puli sa Dios,” mao kana kung unsa gyud kini, usa ka bikaryo ilalum kono sa Dios.

²⁷⁷ Karon, karon, sa dihang nahimo niya kana, dayon unsa ma’y iyang gibuhat pagkahuman? Siya, si Satanas, gigamit niya ang iyang pulitikanhong gahum, nga aduna na siya daan, ug aron maangkon ang pang-relihiyon nga gahum, kon diin gipurongpurongan siya, ug gihiusa kining duha.

²⁷⁸ Ug dayon gihimoan niya siya og usa pa ka korona sa impiyerno. Ug aron kadtong mga nangamatay na, kung makabayad ang mga tawo og igong salapi, nan ipagawas niya kono sila. Kita n’yo? Busa karon siya’y—siya na ang bikaryo sa Langit, sa purgatoryo, sumala sa gusto niyang itawag niini. Walay ingon-anang butang sa Biblia, kita n’yo, apan kinahanglan niyang mohimo-himo og ingon niini. Miingon ang Biblia nga nagagikan kini sa bung-aw sa kahiladman nga walay-kinutoban, ug magabalik sa mao ra nga paagi. Ug, sa yuta, usa ka magmamando!

²⁷⁹ Karon unsa ma’y gihatag kaniya niadtong panahona? Una, aduna siya’y pana, apan wala siya’y unsa man nga udyong. Apan karon aduna na siya’y espada diha sa iyang kamot. Mahimo na niya ang unsa mang butang karon. Dayon miambak siya gikan sa iyang puti nga kabayo; og midagan palayo ang puti nga kabayo. Karon unsa na ma’y ginasakyan niya? Usa ka pula nga kabayo, dugo, kolor-dugo nga pulang kabayo. Gisakyan niya mismo kana. Oh, sigurado. Karon gihatagan na usab siya og dakung gahum ug usa ka espada, aron magpamatay, dayon misakay siya sa iyang kolor-dugo nga pulang kabayo.

²⁸⁰ Nakita nato, sa Ikaduhang Selyo, nga naablihan kagabii, nga giwagtang niya ang pagdinaitay gikan sa yuta ug nagpinatyanay ang mga tawo sa usa’g usa. Ug ang iya mismong listahan sa mga martir, sa iglesiang Romano Katoliko, nagapakita nga nagpamatay sila kaniadto og saysenta’y-otso ka milyon nga mga Protestante, sukad niadtong panahon ni San Hippo nga . . . human ni San Augustine nga taga-Hippo, hangtud sa tuig kinse ka gatus ug otsenta. “Saysenta’y-otso ka milyon.” Diha sa *Great Reform* ni Schmucker, kung gusto ninyong basahon kana, *Glorious Reform*, diay, kita n’yo. Karon, saysenta’y-otso ka milyon ang nailista diha sa listahan sa mga martir! Misugod kadto sa diha nga ang usa sa ilang mga santos kono nagkaadunay pinadayag nga ang si kinsa man nga dili-mouyon sa iglesiang Romano kinahanglan matatay ingon nga usa ka erehes, mao gayud kadto ang nagpaaghat kanila. Aba, nagpaagay gyud siya og dugo! Siya—misakay siya sa iyang puti nga kab- . . . o, sa iyang pula nga kabayo, ug nagpadayon siya sa pagpangabayo. Oh!

²⁸¹ Bueno miabot ang iyang dakung gahum. Gihimo siya nga bikaryo sa Langit, ug gisimba ingon nga Dios. Magmamando siya sa yuta, pinaagi sa paghiusa sa iglesia ug sa gobyerno,

nahimo siyang magmamando sa yuta; og gihatagan siya og usa ka korona tungod niana. Mahimo niyang iampo ang mga kalag pagawas sa purgatoryo. Mahimo usab niyang manga- . . . Siya'y mora na gayud og Dios, ibabaw sa yuta, puli sa Dios. Sa katibuk-an, aduna siya'y dakung gahum nga patyon ang si kinsa man nga dili mouyon sa iyang sugo. Kinsa ba'y makasulti og unsa man kaniya? Dili gyud makasulti og unsa man ang iglesia; siya man ang pangulo niini. Dili pud makasulti og unsa man ang gobyerno; siya man pud ang pangulo niini. Busa, minilyon silang nangamatay. Silang tanan nga mga gagmay'ng iglesia, igsoon, gipangbungkag, ug gipamatay ug gipangpuo, ug gipakaon ngadto sa mga leon, ug tanang uban pa. Kita n'yo? "Ang dragon," ang Roma, "gihatag kaniya ang trono ug pagbulot-an." Mao'y gisulti sa Biblia. Kita n'yo? Ug misakay siya sa iyang gitipo'ng, pula nga kabayo pinaagi sa dugo sa tawo, hangtud nga nahimo kining usa ka pula nga kabayo.

²⁸² Karon nakita pud siya ni Juan nga nagsakay sa usa ka itum nga kabayo. Mibalhin siya, ngadto sa lahi na usab.

²⁸³ Karon kinahanglan ko nga—nga isulti kini sa kung unsa mismo ang pagkasulti niini kanako. Ug kung ingon-ana ug kung miabot kini kanako ug dili kini nagakatakdo sa uban pang mga Kasulatan, nan dili ang Dios ang mihatag niini. Kita n'yo, kinahanglan nga nagakatakdo gyud ang mga Kasulatan, ang tanan niini, ingon nga usa ka kumpletong—kumpletong butang nga sama niana. Ang Kasulatan kinahanglan nagakatakdo Kini sa usa'g usa. Ug ang unsa man nga sukwahi sa Kasulatan. . . Kung nagsulti kanako kanang Manulonda sa Ginoo og unsa man nga dili-uyon sa Kasulatan, nan dili ko Siya toohan. Kita n'yo?

²⁸⁴ Nagsulti ako, didto sa Chicago niadtong miaging adlaw, nga didto silang tanang gatusan ka mga ministro. . . Aduna ba dinhi nga mitambong niadto nga panagtigum? Sigurado. Niadtong panagtigum sa Chicago, miingon ko, "Karon, nagsulti kamong tanan nga aduna kamo'y. . . Naghunahuna mo nga malimbongan ninyo ako dinhi, bahin sa usa ka butang." Halos sama ra sa kung unsay anaa niining lawak karon. Ingon ko, "Unsa man kana? Kanang gibatokan ninyo kanako." Ingon ko, "Gipakita kanako sa Balaang Espiritu, tulo na ka gabii ang milabay, kon asa mapahimutang ang matag usa kaninyo karon. Ug dili na kita madayon nianang. . . Pangutan-a n'yo si Carl dinhi kung dili ba kana tinuod."

²⁸⁵ Ug atua gani si Hank ug silang tanan, "Husto kana." Atua man mong tanan didto nga nakadungog.

²⁸⁶ Ingon ko, "Karon ayaw ninyo kanako, tungod sa akong Ginapanudlo. Mao kana'y problema. Karon gusto kong may usa kaninyo nga moduol dinhi, ug kuhaa ang inyong Biblia ug tindog tupad nako, ug ipanghimakak Kana." Mao kadto ang pinakahilum nga pundok nga inyong nadungog sukad-sukad.

Ingon ko, “Unsa na ma’y nahitabo kaninyo?” Ingon ko, “Kung ingon-ana, kung nasayod mo nga dili man diay mo makabarug batok sa Pulong, nan pasagdi ko ninyo. Kamong mga Doktor sa Divinidad ug tanan na, ug nagapakigsulti kung unsaon, pagpaila ang inyong kaugalingon ingon nga ‘Doktor,’ ‘Doktor,’ ‘Doktor.’ Ug ako’y usa ka . . .” (Oh, ang ginaingon namo ug ni Igsoong Wood nga kami mga “cheechako ra,” o, “mga bag-ohan ra.”) “Wala ko’y edukasyon, wala man lang nakagraduwar sa unsa mang seminaryo o tulonghaan. Apan kuhaa ninyo ang inyong Biblia ug duol dinhi ug tindog tupad nako, og ipanghimakak ang binhi sa serpente, ang bautismo sa Ngalan ni Jesus, o bisan unsa man nianang mga butang nga akong ginatudlo.” Wala gyu’y si kinsa man ang misulti ni usa ka pulong. Nasayod mong tanan niana. Mao kadto ang pinakahilum nga pundok nga nakita n’yo sukad-sukad.

²⁸⁷ Kita n’yo, magpataka lang sila’g tabi kung unsa na lang. Karon, karon ania. Wala ako nagatoo bahin sa mga pagpakiglantugi kang kinsa man nga tawo, gawas lang pag-anaa na sa punto kon diin ginapugos ka na nilang paingon niana. Ug dili man unta ko moadto, pero giingnan man ko sa Balaang Espiritu, miingon, “Adto didto. Suportahan Ko ikaw.”

²⁸⁸ Gisultihan ko na sila daan, tulo o upat ka adlaw sa wala pa kadto. Atua man mong tanan didto ug nadungog n’yo si Mr. Carlson ug sila, ug—ug si Tommy Hicks. Ug atua silang tanan nga nanglingkod didto. Ug miadto ko, tulo ka adlaw sa wala pa kadto, ug ingon ko, “Kinahanglan mong i-kansela kanang lugar.”

²⁸⁹ Adunay bagyo niadtong gabhiona. Nagpahigayon ako og panagtigum. Miingon ang Ginoo, “Adto ka, tindog diha nianang bintana, nianang ikatulong gamay’ng pultahan dinha.” Ug miadto ako didto ug mitindog mismo didto. Naglantaw ko sa gawas nga ingon-niana.

²⁹⁰ Miingon Siya, “Aduna sila’y giandam nga lit-ag para nimo. Hangyoon ka nila nga mamulong diha nianang Ministerial Association of Greater Chicago.” Ingon pa, “Aduna sila’y giandam nga lit-ag para nimo, mahitungod sa imong pagpanudlo sa Akong Pulong.”

²⁹¹ Miingon Siya, “Karon, kanselahon nila kanang lugar didto. Dili na nila abangan kana. Ug mag-abang sila og usa ka lugar, nga kolor tabonon.” Miingon, “Ania ang hitsura niana.” Mihunong ako, ug nakita ko ang akong kaugalingon diha sa usa ka kanto; milantaw ko didto ug nakita. Nakita ko silang tanan didto. Nakita ko silang tanan nga mga ministro nga nanglingkod didto, sa kung unsa ang ilang pagkapuwesto. Gitan-aw ko silang tanan didto. Ug miingon Siya . . .

²⁹² “Oh,” naghunahuna ko, “Mas maayo pang dili na ko moadto didto kung ingon-ana man, Ginoo, kung mao kana ang ilang

buhaton. Dili ko gusto nga makapasakit sa ilang pagbati o makahimo og unsa man nga sayup.”

Miingon Siya, “Adto ka. Suportahan Ko ikaw.” Misuporta Siya mismo. Husto kana.

²⁹³ Karon, kamong tanan, adunay mga saksi mismo dinhi, nga atua mismo didto ug nasayod nga tinuod kana. Husto kana. Bueno, aduna man mo’y mga teyp dinhi, usab. Pero, atua man mo didto, nakita n’yo.

²⁹⁴ Karon, karon, ania ang misteryo niini. Ug karon, Kini, sa dihang gipadayag Kini kanako kaganinang sayo sa buntag, sa wala pa nagbanag-banag. Gibuksan ko sa gilayon ang Kasulatan ug misugod sa pagtan-aw, og gisusi kini. Atua kini mismo. Tulo niini, sa karon, ang bug-os, og supernatural gayud nga gipadayag. Oo. Karon ania ang misteryo sa itum nga kabayo, sumala sa pagkapadayag niini nganhi kanako.

²⁹⁵ Nagsugod siya nga nagsakay kaniya sa panahon pa sa mangiub nga mga kapanahonan. Mao kana ang ginarepresentar sa itum nga kabayo, ang mangiub nga kapanahonan, tungod kay panahon man kadto sa tungang-gabii para sa tinuod nga mga magtotoo nga nagpabilin. Matikdi karon niana nga kapanahonan sa iglesia, nianang tunga-tunga sa mga kapanahonan sa iglesia, ang mangiub nga panahon sa iglesia. Matikdi kung giunsa Niya pagsulti, “Aduna ka lamang og diyutay’ng kusog.” Tungang-gabii kadto para kanila, para sa tinuod nga magtotoo. Karon matikdi. Halos giwagtang kaniadto ang tanang paglaum gikan sa tinuod nga Iglesia, tungod kay gikontrolar man niining maong tawo ang iglesia ug ang gobyerno. Unsa ma’y buhaton nila? Kita n’yo, Katolisismo ang nagkontrolar, sa iglesia ug gobyerno. Ug ang tanan, nga wala miuyon sa Katolisismo, gipamatay. Mao kana’y hinungdan nga nagasakay siya sa usa ka maitum nga kabayo. Ug matikdi kung unsa ang maitum nga butang nga iyang gibuhat, kita n’yo, aron makita ninyo. Ug inyo lang. . . Kung nasayod kamo sa inyong kasaysayan, matikdi kana, dayon inyong. . . Bueno, dili na gani ninyo kinahanglan pang hibaloon kana, aron—aron mahibaloan Kini. Karon matikdi. Wala na gyu’y paglaum. Mao kana ang itum niyang kabayo.

Karon, misakay siya una sa puti niyang kabayo, nga ingon ka maliputon.

²⁹⁶ Dayon gihatagan siya og gahum; giwagtang niya ang pagdinaitay, og minilyon ang gipamatay. Ingon niana ang pagabuhaton niya samtang siya padayon nga nagapangabayo. Ug ginabuhat niya sa gihapon kana. Kita n’yo?

²⁹⁷ Karon, ania siya nga nagasakay sa iyang itum nga kabayo karon, nga migula. Mangiub nga kapanahonan, mao kana nga panahon kaniadto. Halos sa mao rang panahon human nga giorganisa ang maong iglesia, ug nakabaton og gahum, gilutos

nila ang tanang uban pa. Ug nagpadayon kini, sa mga, gatusan ug gatusan ug gatusan ka tuig, mao'y nahibaloan sa matag magbabasa ingon nga mao ang mangiub nga mga kapanahonan. Pila man ang nasayod niana? [Nagaingon ang kongregasyon, "Amen."—Ed.] Oo, mangiub gayud nga mga kapanahonan. Mao kana ang inyong maitum nga kabayo, nga nagarepresentar nianang mangiub nga kapanahonan. Karon, wala'y unsa man lang nga paglaum; wala na gayu'y paglaum. Ang tanan-tanan daw sa mangiub na, para sa luoy'ng mga magtotoo. Karon, mao kana'y hinungdan nga gitawag kana, og girepresentar, sa maitum nga kabayo.

²⁹⁸ "Ang iyang mga pang-timbang, o ang iyang timbangan, diha sa iyang kamot," nakita n'yo. Nagasinggit, "Usa ka denario ang bili sa usa ka litrong trigo, ug usa ka denario ang bili sa tulo ka litrong cebada." Kita n'yo, sa tinuod lang, kanang, trigo ug cebada natural nga panginahanglan kana sa kinabuhi. Gikan niana ginahimo ang tinapay ug uban pang pagkaon. Apan, nakita n'yo, nagapabayad siya para niana. Ang buot ipasabot niini, nga, ginapabayad niya ang iyang mga ginsakupan para sa matang sa paglaum sa kinabuhi nga iyang ginapalauam para kanila, pinaagi sa paghimo... Nagsugod siya nianang panahona mismo, sa pagpabayad kanila para sa mga pag-ampo, nagapabayad para sa pag-ampo. Ginabuhat nila gihapon kana; ang mga pag-novena.

²⁹⁹ Tungod kay, unsa ma'y ginabuhat niya? Ginailog ang mga bahandi sa kalibutan. Ang timbangan, nagatimbang og, "Usa ka denario ang bili sa usa ka litrong trigo; usa ka denario ang bili sa tulo ka litrong cebada." Ang mangangabayo nga nagasakay sa itum nga kabayo, kita n'yo, ginahimo niyang... ginahukasan ang iyang mga ginsakupan sa ilang salapi. Ingon nga, gisulti-nang-daan sa Biblia nga maangkon niya, halos, ang mga bahandi sa kalibutan. Sumala sa gikahisgotan nato sa miaging gabii mahitungod sa Rusya, ug tanan na niana, basta na lang nila ginakuha ang tanang salapi ug ginahukasan ang mga tawo sa tanang butang nga aduna sila, og tanan na. Busa, mao kana.

³⁰⁰ Karon himatikdi. Nakita n'yo na kung asa kanang karaang dugay nang pagpanguwarta, sa iglesia, nagagikan? Pahilayo mo niana nga butang; aron magtukod og usa ka organisasyon, usa ka dakung butang, minilyon-ka-dolyar dinhi. Ug—ug nakita ba n'yo na kung unsa ang inahan niana?

³⁰¹ Salamat, Ginoo. Oh, grabe! Malipayon kaayo ko. Oo, sir. Bueno. Tungod ra gyud sa Iyang grasya. Kana lang. Oo. Bueno.

³⁰² Usa kadto ka tungang-gabii nga panahon. Nasabtan n'yo ba kana karon? [Nagaingon ang kongregasyon, "Amen."—Ed.] Ug dinhi nagapabayad siya para sa matang sa kinabuhi, kana mao ang iyang cebada ug uban pang butang, nga natural; dili espiritual, ha. Kana mao ang cebada, kita n'yo, ingon-ana,

ug cebada nga tinapay ug trigo nga tinapay. Nagapabayad siya para nianang matang sa kinabuhi nga ginahatag niya sa iyang mga ginsakupan. Nagapabayad para maiampo sa mga pari, aron iampo ang mga tawo nga makagawas sa purgatoryo. Nagapabayad! Karon ginakuha ko lang kini gikan mismo sa kasaysayan. Nagapabayad para sa, siguro, pag-novena, siguro, kung unsa kana... ang tanan nga ania dinhi nasayod na man kung unsa kanang... Novena, sa hunahuna ko usa kana ka butang nga kinahanglan mong buhaton, kabalo na mo, usa ka penitensya. Adunay tawo nga kinahanglan bayaran siya niana. Ginadala ang mga bahandi sa kalibutan nganha kaniya, nganha mismo kaniya, nganha sa iglesia mismo. Ug nagapangabayado pa gihapon siya. Oh, siguradong nagapangabayado pa siya. Oo, sir. Nagapangabayado gihapon!

303 Himatikdi. Ania ang maayo nga bahin karon. Matikdi.

...*apan siguradoha* gayud nga *ayaw pag-unsaa*
kining bino ug lana.

304 “Aduna na lamang og diyutay Niini ang nahibilin dinha, apan ayaw gayud paghilabti Kana!”

305 Karon, ang lana mao’y...nagasimbolo sa Espiritu, sa Balaang Espiritu. Hatagan ko kamo og pipila ka mga bersekulo kung gusto ninyo. Adunay duha ka Kasulatan. Sa Levitico, 8:12, kon diin si Aaron, sa wala pa siya misulod, kinahanglan ’una nga madihogan og lana, kabalo na mo. Ug sa Zacarias 4:12, mahitungod sa lana nga nagaulbo, nagaagay sa mga tubo, ug miingon, “Kini mao ang Akong Espiritu, Lana.” Usa pa ka butang, kung gusto n’yong tan-awon ang Mateo, 14... 25, adunay buangbuang nga dalaga, o 25:3, ang buangbuang nga dalaga walay Lana, walay Espiritu. Ug Mateo 25:4, ang maalam nga dalaga adunay Lana sa iyang lamparahan, puno-sa-Espiritu. Espiritu! Ang lana nagatipo sa Espiritu. Oh, himaya! [Ginapalampak ni Igsoong Branham ang iyang mga kamot sa makausa—Ed.] Bueno. Nasabtan n’yo ba kana? [Nagaingon ang kongregasyon, “Amen.”] Okey. Karon, nagatipo ang lana sa Espiritu.

306 Ug ang bino nagasimbolo usab sa kadasig tungod sa kapadayagan. Oh, ako—gusto kong modagan sa tibuok lawak. Katingalahan lang nga wala nako napukaw ang mga kasilinganan, sa dihang gipakita kanako sa Ginoo kana, kita n’yo, “kadasig tungod sa kapadayagan.” Kita n’yo?

307 Ang lana ug bino, diha sa Biblia, magkauban kana, kanunay. Gikuha ko ang maong concordance ug gitan-aw kini. Adunay listahan niana, nga sama—sama *niana*, kon diin magkauban ang bino ug lana, sa tanang panahon. Kita n’yo?

308 Pagmapadayag ang Kamatuoran sa usa ka gikasaad nga Pulong sa Dios ngadto sa Iyang mga balaan nga puno og Lana, mangadasig gyud silang tanan. Ang bino usa usab ka

pagpadasig. Himaya! Mabati ko Kini mismo karon. Dinasig nga may kalipay, og mga pagsinggit! Kita n'yo? Ug, pagmahitabo Kini, aduna Kini og mao rang epekto kanila nga—nga ginahimo pud sa bino ngadto sa usa ka natural nga tawo. Tungod, pagmahatag na ang kapadayagan, mahatungod sa Kamatuoran sa Dios, ug ang tinuod nga magtotoo nga puno og Lana, pagmapadayag kaniya ang maong kapadayagan, ang kadasig nagakadaku ug nagakadaku nga mao'y nagapahimo kaniya nga manglihok sa iyang kaugalingon nga dili-normal. Oo. Himaya! [Nagakalipay ang kongregasyon—Ed.] Kita n'yo, mao kana'y nagakahitabo kanila niadtong panahona. Husto kana, ginapalihok sila sa ilang kaugalingon nga daw sa pagka-salikwaut.

³⁰⁹ Karon, kung gusto ninyo og Kasulatan para niini, sugdi lang ninyo pagbasa ang Mga Buhat 2. Asa man sila kaniadto? Nabatonan nila ang saad nga gisaad kanila. Sa diha nga ang tanang saad sa Balaang Espiritu gibubo na diha kanila. Ug mao'y . . . Gipanghimatud-an kadto nga uyon sa Kasulatan. Karon, nakita n'yo, ang . . .

³¹⁰ Unsa kaha kung miingon sila kaniadto . . . “Karon, kadali lang, gisultihan Niya kita nga maghulat ra dinhi para sa atong ministerio.” Ug human sa walo ka adlaw, miingon na sila, “Bueno, sultihan ko kamong, mga kalalaken-an,” miingon si Marcos ngadto kang Mateo, “Ako—nagatoo ko nga naangkon na nato Kini, mga igsoon. Wala ba ninyo mahunahuna kana? Kita n'yo, naangkon na nato Kini. Samtang ginahulat nato ang atong ministerio karon, kinahanglan na natong mangsangyaw, og magwali. Gisultihan Niya kita nga moanhi dinhi ug maghulat, ug walo na ka adlaw nga ania kita dinhi.”

“Bueno, maghulat sa 'ta og usa pa ka adlaw.”

³¹¹ Siyam na ka adlaw ang milabay. Dayon miduol si Marcos, o—o—o siguro usa kanila, si Juan, miingon, “Ako—ako—nagatoo ko nga dili na ta angay'ng maghulat pa og dugay. Nagatoo kong anaa na kanato Kini. Dili ba?”

³¹² Dayon makita ko si Simon, tungod anaa man kaniya ang mga yawi, kabalo na mo. “Karon kadali lang, mga igsoon! Aduna ma'y ginaingon ang Kasulatan mahitungod niini. Wala man Niya kita giingnan kung pila ka adlaw nga maghulat. Ang ingon Niya, ‘Pagpabilin lang mo dinha hangtud! Pagpabilin lang mo dinha hangtud nga mahitabo ang propesiya ni Joel, hangtud nga mapanghimatud-an ang propesiya ni Isaias.’”

³¹³ “Kay sa nagabungabunga nga mga ngabil ug sa laing mga dila Ako mosulti niining katawhan. Ug kini mao ang kahayahay.” Mao kini ang bino nga gibubo. Unsa man ang bino, diha sa Biblia? Pangpalagsik. “Kini mao ang pangpalagsik nga nagagikan sa Presensiya sa Ginoo.” Kita n'yo? Kini'y—kinahanglan sumala kini sa Kasulatan ha. Kita n'yo?

³¹⁴ Busa, nakita n'yo, nagarepresentar ang bino og kadasig tungod sa kapadayagan. Ug sa dihang mikunsad na ang Espiritu Santo, ug nakita nila ang Kalayo sa Dios nga nahulog diha kanila, aba, hinay-hinay kadtong nagpadasig kanila. Ug mahibaloan mo na lang, nga nadasig na kaayo sila hangtud nga nakahunahuna gayud ang ubang mga tawo nga sila'y mga nangahubog kono, apan nadasig ra diay sila tungod sa kapadayagan. Sa Dios... Ania! Ang gipanghimatud-an nga kapadayagan sa Dios, gipatin-aw ngadto kanila, og nangalipay sila mahitungod Niini. Gisaad kadto sa Dios. Atua gipadayag kadto kanila, ug gipanghimatud-an ngadto kanila. Amen! Dihay usa ka tawo nga nagatindog didto, miingon, "Mao na mismo Kana! Mao na mismo Kana!" Ug mao mismo Kadto, nga gipanghimatud-an pinaagi sa mao rang ilhanan nga aduna kita sa karon. Adunay—aduna gyu'y kadasig tungod sa kapadayagan. Kita n'yo? Ug, bueno, naangkon gayud nila Kini kaniadto.

³¹⁵ Mao kana'y hinungdan nga mahimo ni Pedro nga moduol didto, ug miingon, "Aba, kamong mga katawhan sa Judaea, ug kamo nga nagapuyo sa Jerusalem, paminaw kanako. Kamong tanan nga mga Doktor sa Divinidad, paminawa n'yo kung unsay isulti ko kaninyo, kita n'yo."

³¹⁶ Oh, pagka-kahibulongan! Gipadayag mismo! Gipadayag mismo! Nadasig kaayo sila sa dihang nakita nila kadto nga gipanghimatud-an. Kanunay kanang ingon niana. Kanunay na kining ingon niana.

³¹⁷ Sa dihang nakita ko nga nagsaad ang Dios nga mobuhat og usa ka butang niining panahona, sa dihang gisaad Niya nga ablihan kini nga Mga Selyo sa niining kaulahiang adlaw! Ug wala lang gyud mo nasayod sa kalipay, sa himaya, sa dihang nakita ko Siya nga gipadayag kini, nga nagatindog ako didto ug ginatan-aw kini nga nagakahitabo! Ug nasayod ko nga mahimo kong hagiton ang si kinsa man, nga: wala gayud nagsulti ang Dios og usa ka butang kanato gawas sa kung unsa lang ang nahitabo nga eksakto gayud sa pagkasulti niini. Ug dayon ang masayran ang kalipay nga anaa sa akong kasingkasing, sa dihang nakita ko ang Iyang saad para niining kaulahiang mga adlaw, sumala sa gikasaad na Niyang buhaton kini. Ug dinhi makita ko nga gipanghimatud-an kini ug gihimo nga ingon gayud ka eksakto. Ako gayu'y... Madungog ko ninyo nga miingon, "Gibati ko ang pagkarelihiyoso." Mao kana ang nagakahitabo. Grabe ang kadasig, nga ako—ako—ako gayu'y—halos kataw-anan na ko, kabalo mo. Ang kadasig, tungod sa kapadayagan! Oo.

³¹⁸ Ngani nadasig kaayo sila kaniadto, tungod sa—sa kapadayagan, nga ilang napanghimatud-an, oo, ang saad. Karon, oh, grabe! Miabot ang kalipay sa kadasig, hangtud nga ang mga tawo miingon, "Nangahubog sila sa bag-o nga bino," sa diha nga gipadayag sa Dios ang Iyang saad ngadto kanila. Ug

dili lang nga gipadayag Niya kadto, kondili gipamatud-an Niya usab kadto.

³¹⁹ Mao kana’y kanunay ko nang ginaingon. Makasulti ang usa ka tawo og unsa man, oo, mahimo niyang isulti ang bisan unsa; apan lahi gyud pag moabot ang Dios ug panghimatud-an kana!

³²⁰ Karon, miingon ang Biblia, “Kung aduna ma’y usa sa taliwala ninyo, nga nagaangkon nga espirituhanon o usa ka propeta, kung ginasulti niya kini nga mga butang ug dili kini mahitabo, nan ayaw ninyo siya hatagi og pagtagad. Ayaw siya kahadloki, man lang. Ayaw kahadloki kana nga tawo. Apan kung ginaingon niya ang ingon-niini ug mahitabo kini; Ako kana, nakita n’yo. Ako, anaa Ako niana. Kana ang nagapamatuod nga Ako kana.”

³²¹ Ug, kadtong, luoy’ng babaye nga taga-Samaria. Sa diha nga miingon ang Kasulatan nga pagabuhaton sa niining Mesias ang ingon-niining mga butang, ug atua Siya nga nagtindog didto ug gibuhat kini sa ingon ka eksakto kung unsay gikasulti sa Kasulatan. Miingon ang maong babaye, “Mao kana Siya. Umari kamo, tan-awa ninyo ang usa ka Tawo! Dili ba kana mao ang eksaktong butang nga gikasulti sa Kasulatan nga mahitabo?” Kita n’yo, nadasig siya tungod sa kapadayagan. Husto ba kana? [Nagaingon ang kongregasyon, “Amen.”—Ed.] Nadasig siya tungod sa kapadayagan, sa dihang gipanghimatud-an kadto. Kita n’yo? Husto kana. Hingsayran niya nga adunay. . .

³²² “Nasayod kami nga moabot ang Mesias, Nga gitawag og Cristo. Ug pagmoabot na Siya, pagabuhaton Niya ang ingon-niining mga butang.” Nakita niya kadto.

Ug miingon Siya, “Ako mao Siya.”

³²³ Dayon sugod namuhat ang kadasig. Ug milakaw siya, nga nagasinggit, ug miadto sa siyudad. Gibiyaan niya ang iyang karaang banga, ug miadto didto, ug giingnan ang mga tawo didto, “Umari kamo, tan-awa!”

³²⁴ Karon, kung hingsayran n’yo lang ang Sidlakanong mga tradisyon, sayup alang kaniya nga buhaton kadto. Oo, sir. Ang ingon-niadto nga matang sa babaye, wala gyu’y ni usa ang maminaw kaniya. Wala, sir. Kita n’yo, markado na siya, ug sa dihang siya. . . Kung moadto siya sa dalan nga sama niana, ug manglihok nga sama niana, dili siya panumbalingon sa mga tawo didto.

³²⁵ Apan, igsoon, aduna siya’y dala nga Pulong sa Kinabuhi! Nadasig gayud siya. Mahimo mong. . . Sama lang kini nga ginapaningkamotan mong palongon ang kalayo sa usa ka balay, nga nagakasunog, atol sa mahangin nga adlaw. Oh, may sa kung unsang nagapaypay mismo niini! Siya’y—andam siya kaayo kaniadto. Oo. Dili nila mapalong Kadto. Ang Kalayo kadto sa Dios nga nagadilaab. Oo, sir. Ingon siya, “Kung dili man mo

motoo niini, anhi lang mo dinhi kon diin ginapahigayon ang panagtigum. Ipakita ko kini kaninyo.” Oo. Mao kana. Oo. Oo, sir.

³²⁶ Ug busa miadto ang mga tawo didto. Ug wala na Niya buhata kadto sa usa pa ka higayon. Apan nasayod sila nga aduna gyu’y nahitabo sa maong babaye. Nausab man siya, mao nga gitooan nila si Jesus. Oo, sir. Mitoo na sila Kaniya.

³²⁷ Tungod kay, “Ang pagtoo nagaabot pinaagi sa pagpatalinghug, sa pagpatalinghug sa saad sa Dios, sa Pulong sa Dios, ug makita Kini nga ginapamatud-an nga tinuod.” Tungod nga, Kini’y usa man ka binhi. Ug pag naipugas na Kini, Mabuhi Kini. Mamunga Kini sa kung unsa mismo ang ginasulti Niini. Kay kung dili, nan dili kini Binhi sa Dios. O kaha, dili kahibalo ang magpupugas kung unsaon pagpugas Niini; dili Siya pinadala sa Dios, aron sa pagpugas og mga Binhi. Tingali’g gipugas lang niya ang mga Niini ibabaw sa bato o mora’g ingon niana. Kita n’yo? Busa inyong—busa nakita n’yo, ang magpupugas nga nagapugas sa Binhi, ang Dios na ang bahala Niini, nga mahulog Kini sa husto nga dapit, nakita n’yo. Oh, grabe!

³²⁸ Dayon unsa ma’y ginaingon Niini ngadto niining nagasakay sa itum nga kabayo? “Ayaw pag-unsaa ang Akong bino ug ang Akong Lana! Ayaw Kini paghilabti, ang Akong bino ug Lana! Aduna Ko’y diyutay na lang Niana dinha, apan bisan diyutay na lang pero aduna pa sa gihapon. Sige. Padayona lang ug timbanga ang tanan na nianang matang sa kinabuhi nga imong ginabaligya; anaa ra kana kanimo. Bayaran mo ra man kana sa katapusan. Apan pag mahinagbo mo kanang bino ug Lana, ayaw Kini hilabti!” Oh, grabe! Kung mahimo ninyong, kung inyong . . .

³²⁹ Sa laing pagkasulti, ingon niini, “Kung imong madakpan ang pipila sa Akong diyutay’ng Panon, nga puno sa Akong Lana ug bino, kita mo, bino ug Lana sa putli nga Pulong, kita mo, ug patyon mo sila. Tungod kay, imo, man gud kana buhaton. Mao man kana’y imong ginabuhat. Ayaw gyud sila puga nga isulti kanang imong ‘Maghimaya ka Maria,’ o magbuhat og unsa man nga sama niana, o ang pila man sa imong mga kredito. Ipahilayo mo ang imong mga kamot kanila. Nasayod mismo sila kung asa sila paingon, tungod kay dinihogan man sila sa Akong Lana. Ug tungod nga dinihogan sila sa Akong Lana, aduna sila’y bino sa kalipay, kay nasayod man sila sa Akong Pulong nga saad, ‘Pagabangonon Ko sila pag-usab.’ Ayaw Kana pag-unsaa! Ayaw gyud sulayi nga samokon sila. Tungod kay, basta pahilayo lang gyud Niini. Dili.” Tanan . . .

³³⁰ Ginapanghimatud-an Niya ang Iyang Pulong ug ginatuman Kini. Nasayod gyud sila. Nasayod sila nga magabangon sila pag-usab. Oh, daw sa unsa ko ka gusto kana! Whew! Mangabanhaw sila. Ania nagaabot ang itum nga kabayo, nga nagapangabayo niadtong, mangiub nga mga kapanahonan.

331 Niadtong migula ang puti nga kabayo; nakita nato kung unsay iyang gibuhat, nga ingon ka eksakto. Ania na usab ang pula nga kabayo; og eksaktong nakita sab nato kung unsay iyang gibuhat. Ania na pud ang itum nga kabayo. Nakita n'yo, siya ang mao sa gihapon nga mangangabayo sa tanang panahon, sa kung unsay iyang ginabuhat, sa tanan niadtong mga kapanahonan.

332 Karon nahibaloan nato, nga ginatimbang niya kini ug nagapabayad siya niini, eksakto gayud: trigo, natural, natural nga kinabuhi. Mao kadto ang gikinabuhian nila.

333 Apan, nagasimbolo kadto; sa Espiritu, Lana; ug kalipay sa bino. “Kanang espirituwal nga Kinabuhi, ayaw pag-unsaa Kana. Biyai Kana!” Sa laing pagkasulti, “Roma, ayaw paghilabti Kana! Akoa Kana! Panag-iyá Ko Kana!”

334 Karon aduna ko’y usa pa ka butang dinhi nga gusto kong masayran ninyo. Matikdi, dili kadto ang usa sa upat ka mga Mananap ang miingon, “Ayaw paghilabti ang Lana ug ang bino.” Namatikdan ba ninyo kana? Nagpakigsulti na ang upat ka mga Mananap, apan . . . Matikdi, basahon ko kini dinhi, sa makadiyut lang, kita n’yo, karon.

. . . *litro*, usa ka denario, sa usa ka—sa usa ka . . . *usa ka denario ang bili para sa trigo, ug kinahanglan usa ka denario ang bili sa tulo ka litrong cebada; ug siguradoha nga ayaw pag-unsaa ang bino ug . . . lana.*

335 Karon paminaw dinhi.

Ug ako—ug nadungog ko ang usa ka tingog nga diha sa taliwala sa upat ka mga buhing binuhat . . .

336 Unsa man Kana? Ang Cordero! Amen! Dili kana ang upat ka mga Mananap. Ang Cordero ang nagsulti niana. Ngano man? Pagaangkonon na man Niya ang Iyang mga Iyaha. Mga panag-iyá Niya kana. Gitubos na Niya kana. Kita n’yo? Amen! “Ayaw paghilabti kanang Lana!” Dili, sir. Dili ang upat ka mga Binuhat, kondili ang Cordero Mao’y nagsulti niana. Ug, oh, grabe! Ang Cordero mismo! Dili . . . Dili ang upat ka mga Mananap ang nagpahayag niini. Ang Cordero ang nagsulti, niini Mismo.

337 Sa dihang miingon ang upat ka mga Mananap, “Umari ka ug tan-awa,” ug giadtoan nila, ug nakita nila kana nga ingon niana.

338 Ug miingon Siya, “Usa ka denario ang bili sa usa ka litrong trigo, ug ang bil- . . . ug mao kini ang bili *niini*, sa ingon ka daghan nga cebada.” Apan misinggit ang Cordero, gikan sa taliwala mismo nila, miingon, “Apan ayaw pag-unsaa ang bino ug Lana!” Uh-huh. Husto kana. Oh, grabe! Paminawa kini, “Ayaw pag-unsaa Kini, aba, o magabayad ka niini sa umaabot nga adlaw.” Oh, grabe!

Alas nuebe-traynta na.

³³⁹ Bueno, kutob sa akong nasabtan, ug sa pinakamaayo nga nahibaloan ko, ug sa tanan nga ginatooohan ko sa tibuok kong kasingkasing, mao kana ang tinuod nga kahulogan nianang tulo ka Selyo. Gusto kong pasalamatang ang Dios para niana. Ug isulti ko kini, nga, kini mao ang kapadayagan nga gihatag Niya kanako. Gihatag Niya kini kanako, ang kapadayagan Niini. Ug nagatoo ako nga nagapuyo na kita sa kaulahiing mga adlaw.

³⁴⁰ Ugma sa gabii hisgotan na nato kanang nagasakay sa maluspad-nga-kabayo. Ug sa karon wala pa ako mahibalo. Wala pa ako mahibalo. Kabalo ang Ginoo nga tinuod kana. Wala pa ako'y hingsayran ni usa ka butang mahitungod niini. Wala.

³⁴¹ Gitan-aw ko ang akong dugay nang mga gisulat nga aduna ako mga tuig na ang milabay. Nakita ko si Igsoong Graham Snelling kaganina; tingali migawas siya. Apan, mahinumduman ko sa dihang nagwali ako dinhi, kaniadto. Gitan-aw nako balik kung unsa ba'y akong gisulti daghan nang mga tuig ang milabay. Usa niana ka adlaw gibasa ko ang Basahon sa Pinadayag, og akong gitun-an ang upat ka mga mangangabayo sa usa ra ka higayon.

³⁴² Nakaingon ko, "Ang puti nga kabayo, kana mao ang nahaunang iglesia, walay pagduhaduha." Ingon niana ang nabasa ko gikan sa usa ka libro sa mga Adventist. Ug aduna ko'y nabasa didto. Nakaingon ko, "Kana mao ang nahaunang iglesia nga mitungha, nga nangbuntog." Ug ang sunod mao ang usa ka itum nga kabayo, ingon ko. . . nalimtan ko na karon kung unsay gitawag nako nianang itum nga kabayo. Ingon ko. . .

³⁴³ O, "Ang pula nga kabayo," diay, ingon ko, "tingali kana nga kabayo nagapasabot nga—nga adunay magaabot nga kasamok, ug nagapasabot kini og daghang mga gubat nga mahitabo, o mora'g ingon niana." Ingon ko, "Tingali magkaaduna gyud og daghang mga gubat." Ingon ko, "Mao kana ang mahitabo." Ug dayon ingon pa ko, "Ang—ang maluspad nga kab- . . ."

³⁴⁴ O, "Ang—ang itum nga kabayo," ang ingon ko, "kana—nagapasabot kana nga—nga tingali adunay moabot nga mangitngit nga panahon sa kalibutan, pag ang tanang mga bitoon mohunong—mohunong na sa pagsidlak; mosalop na ang adlaw, ug ang bulan dili na mohatag sa iyang kahayag." Ingon ko, "Tingali mao kana ang buot ipasabot niana."

³⁴⁵ Nakaingon ko, "Ang maluspad pud nga kabayo, nagakahulogan kana nga daghang mga balatian ang magsingabot." Karon, wala ako masayod kung unsa ba gyu'y buot ipasabot niana. Apan, kana'y, ingon niana ra ang akong interpretasyon kaniadto, tungod kay mao ra man ang kutob sa mahimo kong masabtan, ingon nga nagabarug ako dinhi sa pulpito.

³⁴⁶ Apan, oh, hapit kong maisulti kadto! Oo. Hum! Oh! Inyong—makita ra ninyo. Matikdi lang, kita n'yo.

³⁴⁷ Karon, oh, dili ba kita malipayon tungod niining panahon nga atong gikinabuhian! [Nagaingon ang kongregasyon, "Amen."—Ed.] Pagmakita nato kining tanang butang nga nagasingabot na, mahunahuna ko:

Nations are breaking, Israel's awakening,
The signs that the prophets foretold;
The Gentile days numbered, with harrows
encumbered;
"Return, O dispersed, to your own."

The day of redemption is near,
Men's hearts are failing for fear;
Be filled with the Spirit, your lamps trimmed
and clear,
Look up, your redemption is near! (Oh, grave!)

False prophets are lying, God's Truth they're
denying,
That Jesus the Christ is our God;

Nagatoo ba mo Niini? [Nagaingon ang kongregasyon, "Amen."—Ed.]

But we'll walk where the apostles have trod.

For the day of redemption is near,
Men's hearts are failing for fear;
Be filled with the Spirit, have your lamps
trimmed and clear,
Look up, your redemption is near!

³⁴⁸ Dili ba pagkaanindot niana? [Nagaingon ang kongregasyon, "Amen."—Ed.] Gusto ko kana. Haduol na ang katubsanan.

And it shall be Light in the evening time,
The path to Glory you will surely find;
In the water way, is the Light today;
Buried in the precious Name of Jesus.
Young and old, repent from all your sin,
The Holy Ghost will surely enter in;
The evening Light has come,
It is a fact that God and Christ are one.

Siya mao ang Pulong! Oh, grave! Makahibulongan gayud!

Soon the Lamb will take His Bride to be ever
at His side,
All the host of Heaven will assembled be;
Oh, it will be a glorious sight, all of the saints
in spotless white;
And with Jesus they shall feast Eternally.

Oh, "Come and dine," the Master calleth,
"Come and dine;"

Oh, you may feast at Jesus' table all the time;
He that fed the multitude, turned the water
into wine,

To the hungry calleth now, "Come and dine."

Oh, "Come and dine," the Master calleth,
"Come and dine;" (Magkaon diha sa Pulong!)

You may feast at Jesus' table all the time;
He that fed the multitude, turned the water
into wine,

To the hungry calleth now, "Come and dine."

³⁴⁹ Oh, grabe! Gigutom ba kamo? [Nagakalipay ang kongregasyon—Ed.] "Bulahan ang mga gigutom ug giuhaw tungod sa pagkamatarung."

³⁵⁰ Gihigugma n'yo ba Siya? [Nagaingon ang kongregasyon, "Amen."—Ed.] Gihigugma n'yo ba Siya? Ang tono sa *I Love Him*, kabalo na mo. Manindog kitang tanan karon, ug ipataas ang atong mga kamot ug ipahayag ang atong kaugalingon diha Kaniya. "Gihigugma ko Siya, gihigugma ko Siya tungod kay una Siyang nahigugma kanako." Okey, dungan ang tanan karon.

I love Him, I love Him
Because He first loved me
And purchased my salvation
On Calvary's tree.

³⁵¹ [Usa ka igsoong lalaki ang nagasulti og laing mga dila. Mihunong 'sa si Igsoong Branham—Ed.] Magmatinahuron gayud. Aduna kita'y usa ka maghuhubad dinhi, si Igsoong Higginbotham. Wala ko kabalo kung ania ba siya karong gabhiona, o wala. Gusto natong, mahibaloan kung unsay gisulti sa Dios kanato. Kadali lang. Ania, ania... [Usa ka igsoong babaye ang nagahatag og interpretasyon.]

³⁵² Oo, dalaygon ang Ginoo! Nahipataas gayud ang akong pagtoo diha sa Dios. Kamo, gihigugma n'yo ba Siya, karong gabhiona, sa tibuok n'yong kasingkasing? [Nagaingon ang kongregasyon, "Amen."—Ed.] Oh, dayega ninyo Siya, ug moingon, "Salamat Kanimo, Ginoong Jesus!" [Nagadayeg sa Dios ang kongregasyon.]

³⁵³ Ginadayeg Ka gayud namo, sa tibuok namong kasingkasing, Ginoo! Himaya sa Dios!

³⁵⁴ Dayega lang ninyo Siya, kamong tanan. Ang Dios magauban kaninyo! [Padayon nga nagakalipay ug nagadayeg sa Dios ang kongregasyon—Ed.]



ANG IKATULONG SELYO CEB63-0320

(The Third Seal)

SERYE SA KAPADAYAGAN SA PITO KA MGA SELYO

Kining Mensahe ni Igsoong William Marrion Branham, unang giwali sa Ingles niadtong Miyerkules sa gabii, Marso 20, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apod-apod sa Voice of God Recordings.

CEBUANO

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org